

# Liahona



?Olsem Wanem  
Mi Save Help?

Taem Olgeta We Yumi  
Lavem Oli Lego Jos, pej 30

Stap Lan Aot long Olgeta  
We Oli Kambak, pej 26

Olsem Wanem blong Stap  
Andastanem Jos Histri I  
Helpem Yumi, pej 12

JOS I  
STAP LONG  
PLES IA

# Punta Arenas **Jile**





FOTO: KAM LONG GETTY IMAGES

Jos i strong long Jile, stat long ol drae taon blong not kasem bigfala siti blong Santiago long medel, kasem Punta Arenas stek long saot, wetem ol seven wod mo tu branj blong hem. Hemia sam tru samting abaot Jile mo Jos long we.

Ol memba blong Jos



**595,526**

3.3



pesen blong populeesen  
we oli ol memba blong Jos

77 Ol stek,  
590 kongregesen,  
10 misin



100



ol famli histri senta

ol tempol: Santiago  
(oli dediketem long 1983),  
Concepción (oli dediketem long  
2018), Antofagasta  
(oli anaonsem long 2019)



3

2,653

ol mael (4,270 km) stat  
long not saed blong Jile go  
kasem saot saed, 217 mael  
(350 km) longfala stat long  
is go kasem wes

1956

Fas kongregesen  
we oli bin oganaesem

1972

Fas stek we  
oli bin oganaesem

1988

Namba fo kantri long  
wol blong kasem 50 stek

1994-96

26 niu stek we oli krietem





## Kamaot long Liahona

*Ol samting we oli stap insaed long namba ia, oli bin mekem bifo Kovid-19 wol sik ia i hapan. Maet sam ditel oli no stret evriwan. Plis givim sam tingting olsem we i nid folet ol gaedlaen blong Jos naoia, o hemia blong gavman.*

Mi Stap Eksperiensem Fasin la blong Laekem Wan We I Semmak Seks long Mi—?Bae Ol Memba blong Jos I Welkamem Bak Mi?

Bouke "Bob" S. Ecoma Verstege

40



Jos Histro: Wan Ples  
blong Paoa mo  
Inspresen.

Elda Quentin L. Cook,  
Kate Holbrook, mo  
Matt Grow

12



Taem Mi Filim se  
Oli Bin Giaman  
long Mi Abaot Jos  
Travis Ewell

26



## Olsem Wanem Yumi Mekem Fet blong Yumi I Kam Moa Strong—Tugeta

Long stadi blong yumi long Buk blong Momon long manis ia, yumi lanem aboat Koriho, we i bin winim tingting blong fulap Jos memba se ol profet oli bin giaman long olgeta, be afta, hem i bin admitim se hem hemwan, Setan i bin giaman long hem wetem ol nara wan. Yumi lanem aboat ol Soramaet, we evri pipol blong hem i bin seraotem olgeta aot long Jos. Afta yumi luk yangfala Alma, we i bin faet strong agensem Jos, i lukaot blong mekem ol adalt pikinini blong hem i kam moa strong agensem ol joes we bae i lidim olgeta i go longwe long Lod mo Jos blong Hem.

Ol famli memba mo fren blong sam long yumi, oli jus blong nomo tekpat long Jos blong Lod we i bin kambak long wol bakegen. Hemia i save soa bigwan long yumi we yumi gat strong fet. Mifala i wantem blong help, be fulap long mifala i stap tingting se olsem wanem

Wan magasin we i kamaot bae i neva inaf blong tokbaot evri risen blong from wanem fet i go daon o eksplenem olsem wanem stret blong ansa sapos fet i go daon. Rod blong fet blong evriwan i defdefren. Be wetem magasin ia

we i kamaot, mifala i hop blong givim sam help, olsem:

- Eksperiens blong wan man blong kambak long Jos mo wanem hem i bin lanem aot long hem (luk long pej 26).
- Olsem wanem i impoten blong stat welkamem evriwan (luk long 40).
- Sam tingting blong ol papa mo mama long olsem wanem blong gaedem rilesensip blong olgeta wetem ol adalt pikinini we oli bin jusum wan defren rod (luk long pej 30).
- Ol lukluk we i save help fulap long Jos Histro mo olsem wanem i save mekem fet blong yumi i kam moa strong (luk long pej 12).

Mifala i hop se ol stori ia bae i givim wan ples blong stat blong yu blong lukaotem tabu gaed ia blong ol situe sen blong yuwan

Wetem tru hat,  
I Kam long Adam C. Olson  
Manejing Daerekta



# Oi Samting we Oli Stap Insaed

## 5 Wan Invitesen i Go long Oi Artis Raon long Wol ☺

## 6 Oi Eksampl blong Fet ☺

Ignatius mo Adelaide Baidoo

Ol famli Baidoo oli bin luk long olgetawan, ol blesing blong gospel litresi program insaed long stek mo famli blong olgeta.

## 8 Oi Givhan Prinsipol

Givhan tru long Oi Jos Aktiviti

Ol Jos aktiviti i save givim yumi janis blong bildim ol frensip, helpem mo givhan long ol narawan.

## 12 Jos Histri: Wan Ples blong Paoa mo Insperesen.

I kam long Elda Quentin L. Cook, Kate Holbrook, mo Matt Grow

?Olsem wanem nao blong stap stadi long histri blong Jos i save mekem fet mo gladhat blong yumi i kam bigwan moa blong laef folem gospel moa fulwan?

## 20 Stap Pikjarem long Maen, Oi Paeonia blong India

I kam long Taunalyne Rutherford

Ol fetful Sent ia oli soem eksampol blong wanem i minim blong stap olsem ol strong pos blong Jos.

## 26 Taem Mi Filim se Oli Bin Giaman long Mi Abaot Jos

I kam long Travis Ewell

Afta we Brata Ewell i bin lanem sam samting we i mekem fet blong hem i seksek mo i mekem se hem i lego Jos blong wan taem, hem i luksave se wanem nao hem i stap mestem long laef blong hem.

## 30 Yu Lavem, Hem I Sevem ☺

I kam long Krista Rogers Mortensen

Wan mama i luksave se nomata long ol joes blong ol adalt pikinini blong hem, hem i nidim blong lavem olgeta nomo.

## 32 Oi Voes blong Oi Lata-dei Sent ☺

Wan famli i putum ol hadtaem blong olgeta long saed blong givhan; wan man blong plen we i no fraet i stanap from ol bilif blong hem mo i givim insperesen long ol narawan; wan mama i hang strong long wan promes; fogivnes i kam long wan taem we yu no ting se bae i kam long hem.

## 36 Kam Folem Mi: Buk blong Momon 📖☺

Ol wik atikol ia i save sapotem stadi blong yu long Buk blong Momon long manis ia.

## 40 Mi Stap Eksperiensem Fasin la blong Laekem Wan We I Semmak Seks long Mi—?Bae Oi Memba blong Jos I Welkamem Bak Mi?

Taem Brata Verstege i filim wan strong pus blong kambak long Jos, hem i waria baot ol memba se bae oli akseptem hem o no.

⌚ Kwik Riding

📖 Kam Folem Mi Sapot

Long Kova  
Ol pikja i kam long  
stock.adobe.com  
mo unsplash.com



## Oi Seksen

### Oi Yang Adalt

## 44

Fiuja i save stap olsem wan samting we i mekem yu fraet. Be wetem help blong Papa long Heven, yumi evriwan i save **muv fored wetem fet long fuija.**

Long manis ia, ridim ol stori we oli kam long ol nara yang adalt we oli bin lanem sam **ki samting blong stap rere** from fuija.



### Yut

## 52

Lanem abaot olsem wanem **gospel i save jenisim famli blong yu** mo from wanem **ol simpol joes** blong yu long laef i gat mining.



### Oi Pikinini

## Fren

Yu save **stap olsem wan misinari,** !semmak olsem Alma!



## OL JULAE ATIKOL WE BAE OLI KAMAOT LONG INTANET NOMO



**?Yu Gat Sam Kwestin abaot  
Gospel? Hemia Faef Wei blong  
Faenem Ol Ansa**

*I Kam long Chakell Wardleight*

Wan yang adalt i serem olsem wanem  
ol kwestin i save mekem fet i kam moa  
strong taem yu letem hem.



**Oлем Wanem Mi Stap Rere From  
Wan Tempol long India**

*I kam long Yeshwanth Kosireddy*

Wan yang adalt long India i serem olsem  
wanem hem i stap rere from fas janis  
blong hem blong go long tempol.



**I Tekem Wanem blong Kasem Ol  
Stret Mo Gud Tingting blong Hat  
blong Yumi**

*I kam long Deo Dela Cruz*

Wan yang adalt long Filipin i serem olsem  
wanem hem i bin faenem fet taem ol  
plan blong fiuja blong hem i bin jenise.

## FAENEM MOA

Insaed long Gospel Laebri ap o long  
liahona.ChurchofJesusChrist.org, sapos yu save:

- Faenem stret namba blong magasin.
- Faenem ol atikol we oli kamaot long Intanet nomo.
- Lukluk tru long ol magasin blong bifo.
- Sendem ol stori mo ol fidbak blong yu.
- Pem magasin blong i kam evri manis o givim  
olsem wan presen.
- Leftemap fasin blong stadi wetem ol dijitol tul.
- Serem ol atikol mo vidio we yu laekem bigwan.
- Daonlodem o printim ol atikol.
- Lisin long ol atikol we yu laekem bigwan.

## KONTAKTEM MIFALA

Sendem ol kwestin mo fidbak blong  
yu i go long liahona@ChurchofJesusChrist.org

Sendem ol stori blong yu i go long  
liahona.ChurchofJesusChrist.org  
sendem i kam long postofis long:  
*Liahona*, flr. 23

50 E. North Temple Street  
Salt Lake City, UT 84150-0024, USA

**JULAE 2020 VOL. 14 NO. 4  
LIAHONA 16722 852**

Ofisil intanasonol magasin blong Jos blong  
Jisas Kraes blong Ol Lata dei Sent

**Fas Presidentsi:** Russell M. Nelson, Dallin H.  
Oaks, Henry B. Eyring

**Kworum blong Olgeta Twelef**

**Aposol:** M. Russell Ballard, Jeffrey R.

Holland, Dieter F. Uchtdorf, David A. Bednar,  
Quentin L. Cook, D. Todd Christofferson,  
Neil L. Andersen, Ronald A. Rasband, Gary E.  
Stevenson, Dale G. Renlund, Gerrit W. Gong,  
Ulisses Soares

**Edita:** Randy D. Funk

**Ol Adavaea:** Becky Craven, Sharon Eubank,  
Cristina B. Franco, Walter F. González, Larry S.  
Kacher, Jan E. Newman, Adrián Ochoa,  
Michael T. Ringwood, Vern P. Stanfill

**Manejing Daerekta:** Richard I. Heaton

**Daerekta blong Ol Jos Magasin:**

Allan R. Loyborg

**Bisnis Maneja:** Garff Cannon

**Manejing Edita:** Adam C. Olson

**Asisten Manejing Edita:** Ryan Carr

**Pablikesen Asisten:** Camila Castrillon

**Raeting mo Editing:** David Dickson,  
David A. Edwards, Matthew D. Flitton,  
Garrett H. Garff, Jon Ryan Jensen, Aaron  
Johnston, Charlotte Larcabal, Michael R.  
Morris, Eric B. Murdock, Joshua J. Perkey, Jon  
Pinborough, Richard M. Romney, Mindy Selu,  
Lori Fuller Sosa, Chakell Wardleight, Marissa  
Widdison

**Art Daerekta:** Tadd R. Peterson

**Disaen:** Jeanette Andrews, Fay P.  
Andrus, Mandie Bentley, C. Kimball Bott,  
Thomas Child, Joshua Dennis, David Green,  
Colleen Hinckley, Eric P. Johnsen, Susan  
Lofgren, Scott M. Mooy, Aleni Regehr,  
Mark W. Robison, K. Nicole Walkenhorst

**Intellectual Propeti Kodineta:** Collette  
Nebeker Aune

**Prodaksen Maneja:** Jane Ann Peters

**Prodaksen:** Ira Glen Adair, Julie Burdett,

José Chavez, Thomas G. Cronin, Bryan W.  
Gyggi, Ginny J. Nilson, Marissa M. Smith

**Pripress:** Joshua Dennis, Ammon Harris

**Printing Daerekta:** Steven T. Lewis

**Distribusen Daerekta:** Nelson Gonzalez

**Postofis adres:** *Liahona*, Fl. 23, 50 E. North  
Temple St., Salt Lake City, UT 84150-0023,  
USA.

*Liahona* (long Buk blong Momon hem i  
minim "kampus" o "soem rod") oli publisim  
long lanwis blong Albani, Amerika, Bislama,  
Bulgaria, Kambodia, Sebuano, Jaena, simpol  
Jaenis, Kroesia, Tsekoslovakia, Denmak,  
Nedalan, Ingil, Estonia, Fiji, Finlan, Franis,  
Jemani, Gris, Hangari, Aeslan, Indonesia,  
Itali, Japan, Kiribas, Koria, Latvia, Lituania,  
Malagasi, Marsol, Mongolia, Nowe, Polan,  
Portugal, Romenia, Rasia, Samoa, Slovenia,  
Spanis, Swahili, Swiden, Filipin, Tagalog, Tahiti,  
Tai, Tonga, Yukren, Urdu, mo Vietnam. (Namba  
blong magasin long wan yia i jenise folen ol  
lanwis.) (Hamas namba we i kamaot long  
wanwan lanwis long wan yia i defdefren.)

© 2020 i kam long Intellectual Reserve, Inc.  
Oli holeni evari raet. Oli printim long Yunaeted  
Stet blong Amerika.

**Kopi Raet Infomesen:** Wanwan man o  
woman i save kopi ol samting we oli stap  
insaed long *Liahona* blong oli yusum blong  
olgetawan, (wetem ol koling long Jos) be  
i no blong mekem mane. Raet ia oli save  
kareaot long eni taem. Sam long ol pikja ia  
bae oli no save mekem kopi long olgeta sapos  
i gat tabu long hem long kredit laen wetem  
Artwok. Ol kwestin blong kopi raet oli mas  
raetem i go long Intellectual Property Office,  
50 E. North Temple St., Salt Lake City, UT  
84150, USA; email: cor-intellectualproperty@  
ChurchofJesusChrist.org

**For Readers in the United States and**

**Canada** July 2020 Burk 14 No. 4 LIAHONA

(USPS 311-480) Bislama (ISSN 1938-6346)

is published six times a year (January, April,  
May, July, October, and November) by The

Church of Jesus Christ of Latter-day Saints,

50 E. North Temple St., Salt Lake City, UT

84150, USA subscription price is \$5.00 per  
year; Canada, \$6.00 plus applicable taxes.

Periodicals Postage Paid at Salt Lake City,  
Utah. Sixty days' notice required for change  
of address. Include address label from a recent  
issue; old and new address must be included.  
Send USA and Canadian subscriptions to Salt  
Lake Distribution Center at address below.  
Subscription help line: 1-800-537-5971. Credit  
card orders (Visa, MasterCard, American  
Express) may be taken by phone. (Canada  
Post Information: Publication Agreement  
#40017431)

**POSTMASTER:** Send all UAA to CFS (see  
DMM 507.1.5.2). **NONPOSTAL AND**

**MILITARY FACILITIES:** Send address changes  
to Distribution Services, Church Magazines,  
P.O. Box 26368, Salt Lake City, UT 84126-  
0368, USA.



# Evriwan I Semmak long God



## WAN INVITESEN I GO LONG OL ARTIS RAON LONG WOL

**O**li bin invaetem yu blong ol niu wok blong art blong namba 12 Intanasonol Art Kompetisen, we Jos Histri Miusiom i sponsarem long Sol Lek Siti, Yuta.

Evri kaen media artis, stael, mo lukluk long saed blong kalja i welkam. Ol wok blong art we oli jusum, bae oli soem long Jos Histri Miusiom mo onlaen.

Kompetisen ia we bae oli jajem i pulum ol artis raon long wol blong mekem wan efot blong lef-temap tingting blong kriesen blong kwaliti blong art we i kam long ol Lata-dei Sent, blong save soem hamas prodaksen blong ol kalja blong ol Lata-dei Sent i bigwan mo defdefren, mo blong mekem koleksyen blong Jos Histri Miusiom i kam moa bigwan.

- Stamba Toktok: "Evriwan I Semmak long God," i kam tru long insperesen long 2 Nifae 26:33
- Ol deit blong givim art wok: Febwari 1–Jun 1, 2021
- Ol yia: Ol artis i mas gat 18 yia o moa olfala
- Ol Praes: Ol artis we bae oli jusum wok blong olgeta blong oli soem long ol man, bae oli tale-moat long olgeta long Oktoba 2021
- Ol deit blong soem ol art wok ia: Maj 2022 kasem Oktoba 2022

Go long [ChurchofJesusChrist.org/artcompetition](http://ChurchofJesusChrist.org/artcompetition) blong kasem ol ditel blong ol rul, ol samting we i mekem yu inaf blong tekpat, rejista onlaen, mo lukluk ol art wok we i kam tru long insperesen long ol kompetisen we i pas. ■

"[Lod] i mekem wanem we i gud long medel blong ol pikinini blong ol man; mo hem i no mekem wan samting, be samting we i klia nomo long ol pikinini blong ol man; mo hem i askem olgeta evriwan blong kam long hem mo tekem pat long gud fasin blong hem; mo hem i no tanem baksaed blong hem long eniwan we i kam long hem, blak mo waet, slef mo fri, man mo woman; mo hem i tingbaot olgeta we oli no gat respek long tru God; mo evriwan i semmak long God, Ol Jiu tugeta wetem Ol Jentael."

—2 Nifae 26:33



## Ignatius mo Adelaide Baidoo

Akra, Gana



*Ignatius mo Adelaide i bin luk olsem wanem Jos litresi program mo stap lanem gospel long hom olsem senta we oli tokbaot bigwan, i bin blesem ol memba blong stek mo famli blong olgeta.*

CHRISTINA SMITH, MAN BLONG TEKEM FOTO

### Ignatius:

Mi bin kam pat blong gospel litresi program ia olsem wanem memba blong stek presidensi. Mi bin visitim wan klas mo luksave hem i no blong olgeta we oli no save rid mo raet nomo. Hem i blong yumi evriwan blong save andastanem moa gospel blong Jisas Kraes.

*Kam Folem Mi mo stap lanem gospel long hom olsem senta bae i helpem ol famli tu, blong ridim ol skripja tugeta mo lan aot long wanwan long olgeta.*

### Adelaide:

Long famli blong mi, mifala i traem mo mekem wetem wanem mifala i save mekem Evri man i pat insaad. Mi hapi tumas wetem olsem wanem ol pikinini i helpem olgeta wanwan taem mifala i stap ridim. Buk blong Momon tugeta. Oli lavem Buk blong Momon. Mifala i bin gat gutdaem blong stap ridim mo serem testemoni blong mifala tugeta.



### FAENEMAOT MOA

Faenemaot moa long rod blong fet blong ol famli Baidoo, wetem sam moa foto onlaen o long gospel laebri vesen blong atikol ia long [ChurchofJesusChrist.org/go/7620](https://www.ChurchofJesusChrist.org/go/7620).

Lan aot long Presiden Henry B. Eyring abaat olsem wanem ol traehad blong yumi i blong mekem hom blong yumi i kam wan ples blong fet mo lav, i save karem glad we i stap longtaem long ol famli blong yumi long [ChurchofJesusChrist.org/go/7720](https://www.ChurchofJesusChrist.org/go/7720).



# OI Givhan Prinsipol

## GIVHAN TRU LONG OL JOS AKTIVITI





**W**an wei we yumi save givhan long ol wod memba blong yumi, ol neba, mo ol fren, hem i tru long ol Jos aktiviti. Sapos yu planem wan aktiviti folem ol nid o intres blong wan man we yu stap givhan long hem, o, yu invaetem olgeta blong tekpat long ol aktiviti o janis blong givim seves long ol narawan, ol aktiviti long wod, stek, o iven long level blong fulap stek oli save givim ol wei we i gat mining mo entetenmen blong putum yuniti mo mekem ol memba i kam strong.

Ol Jos aktiviti i save openem tu, doa blong ol janis blong givhan. Eksampol. Ol Jos aktiviti i save givim ol janis blong tekpat long ol seves projek we i blesem ol narawan mo bildim wan gudfala rilesensip long komuniti. Ol Jos aktiviti i save stap olsem wan janis tu, blong helpem ol les-aktiv memba blong Jos mo long ol fren blong nara bilif o ol fren we oli nogat wan relijin.

Blong mekem fulap man i pat insa long ol Jos aktiviti i mekem wan janis blong Lod i blesem mo mekem ol wod mo branj, ol neba, mo ol komuniti blong yumi i kam moa strong.



## Stap Bildimap Ol Gudfala Rilesensip

Winta i stap kam, mo David Dickson i nogat wan aedia blong olsem wanem bae hem i kipim famli blong hem i wom.

David, waef blong hem, mo tufala gel blong hem i jes muv i kam long siti blong Fredonia, Arizona, USA, wan ples we i drae mo i stap antap, we ol bigfala red klif i raonem wetem ol smosmol tri mo ol plant we i grin truaot long ful yia.

Haos we famli Dickson i rentem i stap dipen long wan stov we i yusum faea wud olsem mein ples blong karem hot win long hem. David i lanem kwiktaem se blong stap hipimap ol faea i wan skil we i nid blong gat from ol winta long Fredonia i fulap long sno mo aes.

“Mi no bin gat eni faea wud o wan jenso o liven gat save ia long olsem wanem blong yusum wan!” David i talem. “Mi no save wanem bae mi mekem.”

Sam long ol wod memba oli bin askem David sapos famli blong hem i gat inaf faea wud blong save go tru long winta. “I no tekem long taem tumas blong oli luksave se mi no gat inaf,” David i talem. “Ol elda blong kworom oli askem blong helpem mi blong hipimap faea wud. Mi bin fulap wetem fasin blong talem tangkyu, mo akseptem help blong olgeta.”

I no long taem, David i faenem aot se trip ia blong hipimap ol faea wud i wan long ol fulap trip aktiviti we wod i planem gud, oganaesem gud, mo kam gud long hem. Wan Satedei moning, David, ol elda blong kworom, mo ol nara wod memba oli go long ol maonten long wan grup blong ol trak mo trela.

“Long wan afterun nomo, mo tangkyu long ol tul mo save, ol memba blong wod i givim famli wan hip blong faea wud we inaf blong stap tru long tu winta,” David i talem. “Be wanem i moa impoten, i we oli bin tijim mi evri samting mi nidim blong save abaot olsem wanem blong hipimap faea wud miwan. Long taem we bae mi lego Fredonia, mi bin save olsem wanem blong yusum wan jenso, mo mi bin help long fulap nara aktiviti blong hipimap faea wud bitim we mi save kaontem.”

Ol kaen wod aktiviti olsem i no bildim nomo wan gudfala rilesensip nomo long medel blong ol memba blong Jos, be i bildim tu, ol gudfala rilesensip wetem evriwan long komuniti.

“Mi tingbaot wan woman, we i no wan memba blong Jos, we i bin niu long eria ia,” David i talem. “Hem i stap bonem ol timba blong haos nomo blong kipim hom blong hem i wom. Taem mifala i bin lanem abaot situesen blong hem, mifala i mekem sua se hem i bin gat inaf faea wud blong go tru long winta ia. Hem i fulap long bigfala tangkyu mekem se i no save toktok.”

Ol efot blong givhan long Fredonia i mekem sua se evriwan i bin stap sef mo wom truaot long winta.



### Stap Go blong Helpem Ol Narawan

Taem Meg Yost i stap mekem misinari wok long Romania, oltaem hem mo kompanion blong hem i stap visitim wan famli we i nomo stap kam long jos long taem. "Famli Stanica i wan long ol famli long ol fas memba blong Jos long Romania," Meg i talem, "mo mifala i lavem olgeta."

Taem i kam long taem blong plan mo oganaesem wan branj aktiviti, ol lida oli disaed se branj ia bae i wan "Paeonia Naet." Hemia bae i wan naet blong selebretem ol paeonia we oli bin gat bigfala karej blong krosem Yunaeted Stet blong kasem Sol Lek Vali. Bae hem i wan janis tu, blong givim ona i go long ol paeonia blong Jos long Romania.

"Mifala i ting se bae i wan gud wei blong sam long ol memba blong serem testemoni blong laef blong olgeta we i bin jenis mo olsem wanem oli bin luk Jos i gro long Romania," Meg i talem. "Kwiktaem mifala i ting se famli Stanica i mas pat long aktiviti ia. Mifala i invaetem olgeta blong tekpat, !mo oli bin glad tumas!"

Long naet blong aktiviti, famli Stanica i no kam yet be i taem blong aktiviti i stat nao.

"Mifala i wari se bae oli no kam," Meg i tingting bak. "Be long stret taem, oli wokbaot i kam tru long doa. Famli Stanica i serem wan naes testemoni abaot gospel mo Jos. Oli bin storian mo mekem fren tu, wetem ol nara memba we oli nomo luk long taem."

Ol memba blong branj i openem ol han blong olgeta mo welkamem famli Stanica. Long nekis Sandei, Meg i glad tumas blong luk Sista Stanica long jos.

"Taem mi bin visitim branj sam manis afta, !hem i stap kam yet!" Meg i talem. "Mi ting se janis ia blong serem testemoni blong hem mo fil olsem hem i pat mo se oli nidim hem long branj, i bin helpem hem fulap."

### 4 Aedia blong Stap Givhan tru long Ol Jos Aktiviti

- **Planem ol aktiviti we i folem ol nid:** Ol aktiviti oli wan gudfala wei blong ansarem ol defren kaen nid. Oli save planem folem ol stret nid blong wanwan man, woman o grup. Oli mas folem ol nid blong olgeta we oli tekpat, we i sapos oli nid blong save wanwan long olgeta moa, lanem moa abaot gospel, o filim Spirit.
- **Invaetem evriwan:** Taem yu stap planem ol aktiviti, mekem wan spesel efot blong invaetem olgeta we bae oli kasem wan gudfala samting aot long aktiviti ia sapos oli tekpat. Tingbaot ol niu memba, ol les-aktiv memba, ol yut, ol yang singgel adalt, ol pipol wetem disabiliti, mo ol pipol we oli gat defren bilif. Invaetem olgeta i kam long aktiviti we oli intres long hem, mo talemaot hamas bae yu hapi blong oli kam.
- **Leftemap tingting blong tekpat:** Olgeta we yu invaetem olgeta bae oli kasem moa aot long ol aktiviti sapos oli gat janis blong tekpat. Wan wei blong leftemap tingting blong oli tekpat i blong gat wanwan man o woman i yusum ol presen, skil o talen blong olgeta long taem blong aktiviti.
- **Welkamem evriwan:** Sapos ol fren blong yu i kam long aktiviti, mekem evri samting yu save mekem blong mekem olgeta i fil welkam. Mekem semmak, sapos yu luk ol man we yu no save, mekem fren wetem olgeta mo !welkamem olgeta tu! ■

### FAENEMAOT MOA

Long ChurchofJesusChrist.org, yu save wajem video ia "Inviting Others to 'Come and Help'" blong luk hamas i isi blong invaetem ol naran blong givim seves wetem yumi.





### OPENEM HAT BLONG YU

"Oltaem yumi mas luksave mo lukaotem ol niu fes we oli stap kam long ol Jos aktiviti mo miting. . . . Yumi save mekem ol simpol samting blong ol fren blong yumi i filim lav mo welkam . . . , olsem talem halo, smael tru long olgeta, . . . presentem olgeta long ol nara memba, mo sam moa. Taem yumi openem hat blong yumi long ol niu fren . . . , yumi stap mekem wetem spirit blong givhan."

Elder Ulisses Soares blong Kworom blong Olgeta Twelef Apostol, "Wan long Kraes," *Liahona*, Novemba 2018, <https://www.churchofjesuschrist.org/study/liahona/2018/11/saturday-afternoon-session/one-in-christ?lang=bis>

### GIVHAN TAEM YU INVAETEM

Jekem ol wod o branj aktiviti we i stap kam. Tingting long olgeta we yu stap givhan long olgeta mo tingting blong invaetem olgeta i kam long ol aktiviti.



### SEREM OL EKSPERIENS BLONG YU

Sendem long mifala ol eksperiens blong yu taem yu bin givhan long ol narawan, o taem ol narawan oli bin givhan long yu. Go long [liahona.ChurchofJesusChrist.org](http://liahona.ChurchofJesusChrist.org) mo klikim "Submit an Article or Feedback."



I Kam long Elda  
Quentin L. Cook

Blong Kworom  
blong Olgeta  
Twelef Aposol

Ol droing long  
saed blong pej oli  
kam long ol man  
blong stadi long  
histri blong Jos,  
Kate Holbrook mo  
Matt Grow

# Jos Histri

## WAN PLES BLONG PAOA MO INSPERESEN

*Long atikol ia, long wan devosen blong ful wok we oli bin  
holem long Nauvu, Ilinoa, long 9 Septemba 2018, Elda  
Quentin L. Cook mo ol man blong stadi long histri blong  
Jos, Kate Holbrook mo Matt Grow oli bin ansarem ol kwestin  
we ol yang adalt raon long wol i bin gat abaot histri  
blong Jos.*

**E**ida Cook: Jos histri i save stap olsem wan impoten ples blong karem fet, be blong sam pipol, oli save andastanem rong o no luksave. Sam pipol oli iven talem rong ol stori blong bifo blong bildimap tu tingting.

Blong stap lanem ol stret histri blong Jos, bae yumi jone nem hat blong yumi tugeta wetem Ol Sent blong yestedei mo tedei. Bae yumi faenem ol eksampol blong ol pipol we oli no stret evriwan olsem yu mo mi we oli bin go fored wetem fet mo letem God blong i wok tru long olgeta blong mekem wok blong Hem. Mi promes se blong stap stadi histri blong Jos i save mekem fet blong yumi i kam bigwan moa mo gat gladhat ia blong laef folem gospel moa fulwan?

*Taem yumi lanem moa  
abaot Ol Sent long bifo,  
bae yumi kam moa  
strong blong winim  
misin blong yumiwan  
olsem wan gel o boe  
blong God.*



Stori blong Restoresen i wan stori blong sakrafaes, strong tingting, mo fet. Yumi evriwan i pat blong Restoresen mo Jos histri. Wanwan long yumi i gat wan misin blong mekem long laef ia we bae i helpem gospel ia blong fulumap wol. Taem yumi lanem moa abaot Ol Sent long bifo, bae yumi kam moa strong blong winim misin blong yumiwan olsem wan gel o boe blong God.

Long ova long 24 yia we mi bin wok olsem wan Jeneral Atoriti, gladhat ia blong Ol Elda ia i bin blong stap klia olsem we i save stap, long tugeta saed blong Jos histri mo long doktrin. Mifala i filim se efot ia blong putumaot ol niu risos—speseli *The Joseph Smith Papers*, insaed long Gospel Topics Essays, Church History Topics, mo naoia buk ia *Ol Saints*<sup>1</sup>—i wan gudfala wei blong mekem o pipol blong stadi ol samting we i stap insaed long hem we oli tru mo bae i helpem olgeta blong andastanem gospel blong Jisas Kraes long wan wei we i tru.

Wan long ol fevret stori blong mi insaed long *Saints* hem i stori blong Addison Pratt we i stap go long Saot Pasifik. Hem i bin mekem samples 60 baptaes. Waef blong mi, Mary, mo mi, i gat janis blong visitim Ol Ostral Aelan, Franis Polinesia, long ples we Addison Pratt i bin tij long hem.

Wan long ol eksperiens blong mi we mi bin gat we i naes tumas hem i blong harem wan yang woman long we i talem: “Mi mi wan namba seven jeneresen memba blong Jos.” Addison Pratt i bin baptaesem wan bubu blong hem blong bifo, bifo Ol Sent i bin go long Yuta.

Long wea ples we yu stap long hem long wol ia, wanem laen we yu kamaot long hem, yu yu impoten, yu yu pat blong Jos histri. Mifala i nidim yu tumas mo wantem yu. Bae yu yu blesem laef blong ol pipol.

## **Josef Smit mo Buk blong Momon**

Taem mi bin yangfala, mifala i bin tingting se bigfala brata blong mifala bae i no save go long wan misin from wod i gat raet blong sendem wan yang man nomo i go long misin long wan taem. Evri narawan bae i mas stap blong go joenem ami. Be bisop mo stek presiden blong mifala, tufala i faenem se oli save sendem moa yang man. Mekem se tufala i toktok long brata blong mi long saed ia, mo hem i kambak hom, mo talem long papa mo mama blong mi.

Papa blong mi i wan gudfala man, be hem i no aktiv long Jos. Ansa blong hem, i no—from sam defren kaen risen. Hem i no stap agensem Jos o wan misin, be brata blong mi i stap rere blong go long medikol skul. Papa blong mi i talem: “Yu bin mekem yuwan i rere blong go long medikol skul. Yu bin tekem ol klas. Yu save mekem moa gudfala samting sapos yu go long medikol skul bitim we yu go long wan misin.”



## **?From wanem Jos i no tokbaot tumas sam long ol samting we i stap long histri blong hem?**

### **I kam long Kate Holbrook**

Taem mi gat fo yia, mama blong mi mo bubu woman blong mi i bin wok long Haos blong Bi, long olfala haos blong Brigham Yang long Sol Lek Siti, Yuta. Oli bin tijim mi abaot Brigham Yang mo we hem i bin gat fulap waef. Samples 10 yia afta, mi bin lanem se Josef Smit i bin gat plante waef. Mi no bin lanem abaot ol sia ston we Josef i bin yusum blong help blong transletem Buk blong Momon, kasem taem we mi bin wan adalt. Jos i no bin haedem infomesen ia long mi, be oli no bin givim tumas histri infomesen taem mi bin yangfala.

Wanem we mi bin lanem long ol miting long Sandei mo long seminari klas, hem i wanem i stamba wok blong Jos. Mi bin lan blong sakem sin. Mi bin lan blong mekem laef blong mi i stret gud wetem gospel blong Jisas Kraes. Mi bin lanem hao blong gat wan gud rilesen-sip wetem Papa we i stap long Heven. Olgeta ia, oli ol samting insaed long laef blong mi, we mi holem i impoten tumas. Mi save se, long sam pipol, bae i soa tumas blong lanem abaot wan samting we yu ting se yu sapos blong save, be yu no save. From hemia nao, Matt mo mi i mekem wok we mitufala i stap mekem. Mitufala i hop se ekspe-riens ia, long ol pipol, bae i kam pat blong wanem i pas finis, from se yumi gat buk ia, *O/Sent*, we i givimaot wan ful histri long ol pipol.



## ?Olsem wanem yumi save sapos wan sos abaot histri blong Jos, i wan sos we yumi save dipen long hem?

I kam long Matt Grow

Mi wok blong Jos long ol las naen yia mo mi stap raet abaot histri. Mi bin luk fasin we ol Jeneral Atoriti blong yumi oli gat wetem histri blong yumi. Ol storian oli no abaot “?Olsem wanem yumi haedem o blokem histri infomesen?” Be, ol storian oli abaot “?Olsem wanem yumi mekem histri ia i stap blong man i save ridim mo andastanem?”

Yumi evriwan i save se jalenj, long taem ia blong yumi tedei we i abaot infomesen, i no blong faenem ol ansa—ol ansa oli raonem gud yumi—be, hem i blong luksave bitwin ol gud ansa mo ol nogud ansa, gud infomesen mo nogud infomesen. I gat plante storian onlaen abaot histri, mo plante long ol storian ia oli givim moa faea bitim laet.

Lukaot gud abaot ol ples we infomesen ia i kamaot long hem; lukaot gud long infomesen ia se i jes wantem blong brebrekem wan pipol. Be, yufala i lukaotem ol ples blong kasem infomesen we oli stanap long ol histri we ol pipol ia nomo oli putum i stap, mo oli stret long olgeta. I rili isi blong pleoplei gem ia, “Ah mi kasem yu” wetem wanem i pas finis; i isi blong karem wan kwot o wan smol samting we i bin hapen mo no tokbaot hao i kam blong hapen, mo mekem se smol samting ia i kam bigwan mo man i mas lukaot long hem.

Olsem wan we i stap raetem histri, mi traem blong folem advaes blong wan man Inglan we i stap raetem buk. Hem i talem: “Wanem i pas bifo, i wan nara kantri: oli mekem samting i defren longwe” (L. P. Hartley, *The Go-Between* [1953], prologue). Hemia i minim se taem yumi stap gobak blong luk wanem i bin hapen bifo, yumi no wantem stap olsem wan “doti turis.” Yumi wantem traem blong andastanem ol pipol long taem we oli bin stap laef long hem, wetem ol kalja blong olgeta long tetaem ia. Yumi wantem gat longfala tingting wetem wanem we yumi luk se oli ol rong blong olgeta. Yumi wantem blong gat tingting i stap daon from save blong yumiwan i we i no longwe tumas. Mo yumi wantem gat spirit blong jareti abaot wanem i bin hapen bifo.



Long naet ia, fetful mo gudfala brata blong mi, i sidaon wetem mi, mo mitufala i toktok. Mitufala i faenem se i gat trifala kwestin we bae i talem wanem ansa blong givim long papa blong mifala. Faswan: “?Jisas Kraes, i Sevyä blong wol o nogat?” Nambatu: “I rili tru we Buk blong Momon i tok blong God.” Nambatri: “Josef Smit i rili wan profet?” Mi bin luksave se ol ansa long ol trifala kwestin ia bae i jenism evri desisen we bae mi mi mekem long ful laef blong mi.

Mi bin lavem Sevyä oltaem mo mi bin ridim Buk blong Momon, be mi luksave hamas ol ansa ia oli impoten, nao, mi bin prea long naet ia mo kasem, tru long Tabu Spirit, wan gudfala ansa long ol kwestin ia. Jisas Kraes i Sevyä; Buk blong Momon hem i toktok blong God; mo Josef Smit i wan profet. Mi testifae se ol samting ia oli tru.

## Fasin blong Man i Maredem Fulap Woman

Mi wantem tokbaot tri poen abaot fasin we man i maredem fulap woman. Faswan, hem i klia se i bin gat plante praktis blong fasin blong man i maredem fulap woman. I bin gat plante lav mo yuniti, be tu, i bin gat sakrifaes, mo ol papa mo mama long ol mared ia oli bin tijim ol pikinini blong olgeta blong mekem sakrifaes. Plante long ol pikinini ia we oli kamaot long ol kaen mared ia, oli bin tekem gospel blong Jisas Kraes i krossem wol, mo oli bin blesem plante laef.

Nambatu, i bin gat sam, olsem Vilate Kimball, we i bin kasem revelesen blong hemwan—bifo oli bin save fulwan wanem i bin stap kam—se doktrin ia i bin kam long God.<sup>2</sup>

Mo nambatri, long ol senia kaonsel blong Jos, i bin gat wan filing se fasin blong man i maredem fulap woman, olsem we oli bin stap mekem bifo, i bin gat stamba tingting blong hem i stap. Yumi sapos blong givim ona long Ol Sent ia, be stamba tingting ia, i kamtru o i hapen finis nao.

Naoia, i gat ol kwestin we oli no gat ansa. Be mi wantem yufala blong save se yumi gat wan Papa long Heven we i gat lav, we i gat wan plan we i stret evriwan, we plan ia i wan plan blong stap hapi, mo yumi gat wan Sevya we i bin mekem evri samting blong yumi. Yumi save trastem Tufala.



## ?From wanem ol stori blong Fas Visen blong Josef Smit oli defren smol?

I kam long Matt Grow

Josef Smit i bin raetem o i bin askem olgeta we oli raet blong hem blong oli raetem fo defren stori abaot Fas Visen. Ol stori ia oli talem wan semfala stori nomo, be sam samting nomo i defren. Hemia i no sapos blong mekem yumi sapraes. Sapos evri stori ia oli semsemak, bae taem ia nao, mi, olsem wan man blong raetem histri, bae mi gat tu tingting, from se hemia i no wei we memori blong man i wok. Plante taem yumi luk semfala paten long ol stori insaed long histri o insaed long ol skripja Ol Wok 9:7; 22:9).

Mo tu, kipim long maen se i had tumas blong putum wan tabu eksperiens long toktok. Josef Smit i singaotem lanwis, se hem i wan "smol, bunbun kalabus" (insaed long *History of the Church*, 1:299). Tingbaot ol eksperiens blong yuwan we oli moa tabu. ?Hem i isi o no blong raetem evri stret samting we i hapen long ol toktok? Yumi sapos blong selebret se yumi gat plante defren stori from se oli givim yumi ol niu wei blong tingting mo ol niu wei blong lukluk samting. Go ridim ol fo fasfala stori blong Fas Visen we oli stap long ol "Gospel Topics". Taem yu mekem olsem, bae i mekem yu talem tangkyu moa long wanem i bin hapen long dei ia.

## ?Wanem nao rol blong Yurim mo Tumim insaed long translesen blong Buk blong Momon?

I kam long Kate Holbrook

Josef Smit i bin transletem Buk blong Momon tru long presen mo paoa blong God. Yurim mo Tumim, we oli tokbaot insaed long Buk blong Momon, oli bin berem wetem ol buk ia. Taem we Moronae i bin givim ol buk we oli wokem long gol i go long Josef, hem i bin givim tu Yurim mo Tumim. Sia ston ia, we Josef i bin yusum tu blong transletem ol toktok, oli no bin berem wetem ol buk ia. Hem i bin wan samting we Josef i bin faenem hemwan, sam yia bifo, we i bin helpem hem blong i filim revelesen long saed blong spirit. Mekem se hem i yusum tugeta samting ia.

Ema Smit, wan long olgeta we i stap raet blong hem, i bin tingbaot afta se eni taem we Josef i sidaon blong stat blong mekem translesen, bae hem i no askem: "?Mi stap wea nao? ?Mi bin stop wea?" Bae hem i stat nomo long stret ples we hem i bin stop. Sapos yu luk long pej blong jenol blong Josef Smit, we hem nomo i raetem tri yia afta we hem i bin transletem Buk blong Momon, hem i fulap long ol toktok we hem i krosemaot, ol tingting we i no finis, mo ol sentens we oli hafhaf. Taem yu lukluk long wan pej blong Buk blong Momon we hem i talem mo man i raetem, i no gat eni long ol samting ia. Hem i fulwan, lanwis i naes—i gat ful sentens, mo i no gat samting we oli krosemaot.

Evri samting ia i interesting blong tingting long hem, be wanem i mata moa i wanem i stap insaed long Buk blong Momon. Buk blong Momon i ples we King Benjamin i bin tijim mi blong gat, faswan, open hat mo tingting, be i no blong gat jajmen; i ples we Alma i tijim mi wanem mining blong kasem baptaes, wanem mi promes blong mekem blong ol nara Sent, mo wanem blong mekem wetem olgeta. Buk blong Momon i ples we Momon mo Moronae i tijim mi abaot hamas loa blong jastiti i impoten, mo wanem mi mas mekem blong kasem hemia. Buk ia i jenisim ol samting insaed long mi we i mekem huia mi tedei, mo wei we mi lukluk long wol.

## ?From wanem oli bin praktisim fasin blong maredem fulap woman long ol fas yia blong Jos?

I kam long Kate Holbrook

Instraksen long Buk blong Momon long saed blong fasin blong stap maredem fulap woman, i stap talem se tingting blong Lod blong ol pipol blong Hem, i blong wan man i maredem wan woman nomo; be i gat ol taem we bae i no olsem; ol taem we God i givim oda blong oli praktisim fasin blong maredem fulap woman blong resemap wan pipol we i stret mo gud (luk long Jekob 2:30). Hemia i wan taem ia nomo we Josef Smit i bin kasem oda blong statem hemia. Josef i pulum leg blong hem blong plante yia blong statem praktis ia, be long en, hem i bin mekem from se hem i bin wantem blong obei long komanmen we God i bin givim long hem. Hem i bin traem blong praktisim fasin blong maredem fulap woman long medel blong ol yia 1830, be rili, hem i long 1841, we sloslo, mo long wan moa ofisol fasin, we hem i stat blong putum hemia long praktis wetem olgeta we hem i bin stap wok wetem. Olgeta oli sek. Afta, oli bin prea strong long Papa blong olgeta we i stap long Heven blong oli andastanem prinsipol ia, mo oli bin kasem witnes long saed blong spirit, blong olgetawan, se hemia i bin raet blong olgeta oli mekem long tetaem ia.

Fasin blong maredem fulap woman, we oli bin praktisim long wan ofisol fasin blong 50 yia, i bin wan samting we ol pipol oli bin save jusum. Ol man blong stadi, oli stap traem yet blong faene-maot hamas adalt Ol Lata-dei Sent oli bin stap praktisim fasin blong maredem fulap woman, be yumi save se i wan smol namba blong Ol Sent nomo. Mo yumi save se plante long olgeta oli bin ol strong memba blong Jos blong yumi. Long 1890, Presiden Wilford Wudrof (1807–98) i putumaot wan pablik dikleresen blong endem praktis blong fasin blong maredem fulap woman. Taem sam pipol oli harem pablik dikleresen ia, oli harem gud tumas. Fasin blong maredem fulap woman, i bin had long olgeta. Taem sam narawan moa oli bin harem pablik dikleresen ia, oli harem nogud tumas. Oli bin sakrifaes long plante samting, mo oli bin kasem testemoni abaot prinsipol ia.

Sam memba blong Jos oli stap askem olgetawan se, praktis ia blong bifo, blong gat fulap woman, bae i minim wanem long nekis laef. Ol lida blong Jos oli bin tijim se fasin blong maredem fulap woman, i no wan nid blong kam olsem wan god, o blong kasem glori ia we i no save finis. Nomata we, mi, miwan, mi glad se fasin blong wan man i maredem wan woman nomo, i rul we i stap, mo fasin blong maredem fulap woman i wan samting we i hapen wanwan taem nomo, mi no ting nating long ol testemoni mo stret fasin blong obei blong ol bubu blong yumi bifo, we oli bin praktisim prinsipol ia. Oli bin obei, mo oli bin gat wan testemoni we i bin raet.



## Tempol mo Ol Kavenan

Long Ketlan, Ohaeo, wan long ol bigfala samting we i bin hapen, i blong oli bildim mo dediketem Ketlan tempol. Dedikesen prea, we Josef i bin kasem tru long revelesen, i kamaot long 109 seksen blong Doktrin mo Ol Kavenan. Long prea ia, hem i askem Lod blong akseptem ol wok blong han mo sakrifaes blong Ol Sent, blong bildim tempol.

Wan wik afta long dedikesen blong tempol, Josef Smit mo Oliva Kaodri, tufala i gat wan nara visen. Hemia i bin hapen long Ista, we i taem blong Pasova tu. Lod i bin kam long wan visen mo i bin akseptem haos ia. Hem i talem long Ol Sent se oli mas glad from “we oli bin bildim haos ia long nem blong [Hem] wetem strong paoa blong olgeta” (Doktrin mo Ol Kavenan 110:6). Afta we visen ia i klos, trifala profet blong bifo oli kamkamaot: Moses, we i putumbak ol ki blong kam tugeta blong Isrel aot long ol fofala pat blong wol; Elaeas, we i bin komitim dispensesen blong gospel blong Ebraham; mo Elaeja, we i bin putumbak ol ki blong siling paoa (luk long Doktrin mo Ol Kavenan 110:11-16).

Restoresen blong ol ki ia, i wan mas blong mekem ol stamba tingting blong Lod oli kamtru. Yumi nidim Buk blong Momon, be tu, ol ki ia mo ol tempol odinens.

Olgeta ki ia oli neva bin moa impoten bitim tedei.

Mi bin luk se taem wan long Olgeta Twelef Aposol, oli singaotem hem i kam profet, hat blong hem i tanem i go long ol odinens blong tempol long wan bigfala

wei. Mi bin gat spesel janis ia blong stap long dedikesen blong Nauvu Ilinoia Tempol wetem Presiden Gordon B. Hinckley (1910–2008). Mi tingbaot se hem i tajem hat blong hem se bae oli bildim tempol ia mo hamas i bin impoten long hem blong tekem ol tempol i go long Ol Sent. Presiden



Thomas S. Monson (1927–2018) i bin gohed wetem wok ia mo i bin kasem semfala insperesen we i kam long heven, we Presiden Hinckley i bin gat. Mo yumi bin luk insperesen ia long wan bigfala wei wetem Presiden Russell M. Nelson. Wok blong profet i kam long hem, mo hem i bin gat moa filing mo tingting se ol odinens blong tempol oli moa impoten.

Wan long ol fas mesej olsem Presiden blong Jos i bin blong leftemap tingting blong ol pipol blong go long tempol, kasem ol odinens blong olgeta, mo stap long kavenan rod ia. Stret afta long hemia, hem i talem se, sapos wan i bin foldaon mo kamaot long kavenan rod ia from eni risen, blong hem i kambak long rod ia.<sup>3</sup>



## ?Olsem wanem wok blong tempol i blesem ol fasfala Ol Lata-dei Sent?

### I kam long Matt Grow

Taem we Josef Smit i bin ded, ol wol blong Nauvoo Tempol oli no kasem haf wei yet, mo i bin kam klia long Presiden Brigham Young (1801–1877) se bae oli ronemaot Ol Sent bakegen. Mekem se hem i askem Lod: “?Bae mifala i stap ia mo finisim tempol, from se mi save se bae mifala i mas lego tempol ia stret afta we i finis, o bae mifala i aot naoia?” Ansa i bin kam i klia: “Stap” (luk long Brigham Young diary, Jan. 24, 1845, Church Archives; Ronald K. Esplin, “Fire in His Bones,” *Ensign*, Mar. 1993, 46). Ol odinens blong endaomen mo blong siling i bin impoten tumas, mekem se Ol Sent oli mas stap.

Mo blong long nekis yia afta hemia, oli bin putum evri samting we oli bin gat insaed long tempol. Kolosap long en, man i bonem hom blong olgeta raon long Nauvoo, mo Ol Sent oli stap rere blong muv i go Wes, jes long taem ia we oli stap finisim tempol. Long Disemba 1845, fulap samting long tempol i finis finis, mekem se Ol Sent oli save dediketem haf blong hem, mekem ol endaomen blong olgeta we oli bin klin inaf, mo silim ol hasban mo ol waef tugeta.

Ova long samfala manis afta, oli bin wok dei mo naet blong mekem evriwan oli rere long saed blong spirit from bigfala wokbaot ia i go long Wes. Long mi, hemia i bigwan mo i tabu tumas se mi mi sil, tru long semfala paoa ia, long waef blong mi, ol pikinini blong mi, mo ol jeneresen we oli go fastaem finis, mo ol jeneresen we oli no bon yet i kam long wol. Hemia i wanem Restoresen i mekem i posibol.

## ?Yu yu save serem wan taem blong Restoresen we i bin mekem testemoni i bin kam strong moa?

### I kam long Kate Holbrook

Mi tingbaot stori blong Ema Smit, we i stap traem blong ronwe long ol fasin blong agens long Misuri. Misisipi Reva, haf blong hem i kam aes—be aes i no strong inaf blong wan wagun wetem ol pipol mo ol samting we oli gat oli save travel long hem. Hem i wan reva we i bigwan, mo i denja blong krosem. Ema i gat wan pikinini blong sikis yia we i stap holem wan saed blong sket blong hem, wan eit yia we i stap holem narasaed, wan we i gat tu yia we hem i holem long wan han blong hem, mo wan bebi long nara han blong hem.

Tawi blong wan long ol man blong raet blong Josef, i bin somap ol koten bag we oli fasem raon long wes. Insaed long ol bag ia, andanit long sket blong hem, Ema i putum wan kopi ia nomo blong translesen blong Baebol we Josef i bin mekem, mo Josef i bin wok long hemia blong plante manis finis. Wetem ol pepa ia mo wetem ol pikinini blong hem, hem i tekem wan step afta narawan blong krosem reva ia we i aes, wetem hop ia se bae hem i no foldaon long aes ia.

Long mi, hemia i bigfala saen blong strong paoa long tingting mo blong fet—se taem yu nid blong mekem wan samting from samting we yu stap biliv long hem, yu jes muv i go fored, wan leg long fored blong narawan.



## "Stap Glad"

Plante long yufala i gat ol tes mo ol hadtaem. Sam oli kam from se i gat fridom blong mekem joes. Sam oli kam from se i gat wan enemi. Be yufala i nid blong save se yumi gat wan Papa we i stap long Heven we i gat lav, mo Atonmen ia blong Jisas Kraes i save blesem yumi long ol wei we, maet yumi no andastanem fulwan.

Sam long ol man we oli raetem histri, oli talem se namba blong Ol Sent we oli bin ronwe long Misuri i go long Nauvu long taem blong Winta blong yia 1838 kasem 1839, i bin bigwan, i kasem 8,000 man. Hem i bin wintataem. ?Josef i bin stap wea? Hem i bin stap long Libeti Kalabus, wetem hat we i brok from ol samting we Ol Sent oli bin stap gotru long hem. Hem i bin filim se God i lego hem.

Long nogud taem ia, hem i bin kasem sam long ol naesfala skripja—ol sekSEN 121, 122 mo 123 long Doktrin mo Ol Kavennan. Oli impoten tumas. Mi hop se bae yu go ridim olgeta. *Saints* i gat wan sot histri blong taem ia.

“Josef i bin prea laod long bihaf blong ol sent ia we oli no gat rong. ‘O Lod, ?kasem wetaem nao bae oli harem nogud from ol fasin we oli rong mo i no folem loa, bifo we hat blong yu i kam sofsof long olgeta, mo ol insaed blong yu i filim lav mo sore long olgeta?”

“Boe blong mi, bae pis i stap long sol blong yu,’ Lod i ansa. “Ol samting we oli kam agensem yu mo ol hadtaem blong yu, oli blong smol taem nomo; mo afta, sapos yu mekem gud blong stap strong, God bae i leftistem nem blong yu long heven; bae yu win ova long evri enemi blong yu.”

Lod i talem gud long Josef se Hem i no fogetem Josef. “Sapos ol stret jo blong hel oli open bigwan blong solemdaon yu,’ Lod i talem long Josef, ‘nao yu mas save, boe blong mi, se evri samting ia bae i givim eksperiens long yu, mo bae i blong gud blong yu.’

“Sevya i bin talem bakegen long Josef se Ol Sent oli no save safa i bitim wanem we

Hem i bin safa. Hem i lavem olgeta mo i no save mekem sobodi blong olgeta i stop, be Hem i jusum blong i safa wetem olgeta, i tekem ol harem nogud mo krae sore blong olgeta, olsem pat blong sakrifæs blong Hem we i bin pem præs from sin. Kaen safaring ia i bin fulumap Hem wetem sore, mo i bin givim Hem paoa blong givhan, mo mekem evriwan we oli tanem olgeta i long Hem long taem blong tes blong olgeta, oli kam gud moa. Hem i askem strong long Josef blong holemaet hem, mo i promesem hem blong i neva lego hem.”

Elda Hiba J. Kimbol (1801–68) i ting se ol jastis long Misuri Suprim Kot bae oli lego Josef i fri, be oli disaed blong no mekem. Hiba i gobak long Libeti Kalabus mo oli no letem hem i go insaed long kalabus. Nao hem i singaotem Josef i talem rabis nius long hem.

Josef i bin kaen mo i toktok gud long hem. “Stap glad,” hem i talem. Afta, hem i givim instraksen long Hiba blong “tekem evriwan long Ol Sent oli go longwe olsem we i posibol.”<sup>4</sup>

I gat wan lesen blong yu long ples ia: stap glad i nomata wanem jalenj yu stap fesem. Sapos i gat samfala samting we oli kam temtem yu, ronwe long olgeta. Dipen long Tabu Spirit. Eksampol blong Josef long Libeti Kalabus mo Ol Sent we oli stap ronwe long Misuri i go long Nauvu, oli ol gudfala eksampol blong paoa mo fet long Lod Jisas Kraes.

Olsem wan Aposol, mi talem witnes blong mi long saed blong Jisas Kraes. Mi mi wan tru witnes we Hem Hem i Hae Tumas. Mi wantem yufala i save se Hem i stap soem rod mo i stap lidim Jos ia long wan wei we bae i blesem yufala evriwan. Mi testifae long yufala se Hem i stap laef. ■

*Blong wajem ful divosen, go long devotionals.ChurchofJesusChrist.org.*

### OL NOT

1. Ol sos ia oli save faenem long history.ChurchofJesusChrist.org.
2. Luk long Orson F. Whitney, *Life of Heber C. Kimball* (1945), 327.
3. Luk long Russell M. Nelson, “Taem Yumi Stap Go Fored Tugeta,” *Liahona*, April 2018, 7.
4. Luk long *Saints: The Story of the Church of Jesus Christ in the Latter Days*, Vol. 1, *The Standard of Truth: 1815–1846* (2018), 389–90; saints.ChurchofJesusChrist.org.



### I kam long Travis Ewell

**S**am yia i pas, mi stap folem wan storian long sosol media bitwin tu long ol kompanion blong mi we mifala i bin wok tugeta long misin. Ol man ia we mi lavem mo respektem.

Oli stap storian raon long ol kwestin we oli gat abaoit Jos mo doktrin blong hem. I no longtaem, i kam klia long se tufala tugeta i bin lego Jos. Mi sek mo i mekem tingting blong mi no stap kwaet. Mi bin neva harem sam long ol samting we tufala i stap tokbaot. Mi filim se mi mas save sapos ol samting ia i gat mining. Mekem se mi stat blong ridim gud ol raorao blong olgeta we oli gat poen long Jos.

Sam long ol samting we mi ridim long tufala nekis ia yia ia i lidim mi blong gat kwestin abaot evri samting blong Jos. Sam we oli stap go tru long hemia i filim nogud. Oli harem nogud bigwan from fet blong olgeta we oli lusum. Mi kam blong kros. Mi filim se Jos i bin giaman long mi. Mi no sua wanem i tru o huia mi save trastem.

Mi bin gat had taem blong stap go long jos. Mi askem blong oli rilisim mi long koling blong mi. Rilesensip blong

mi wetem waef blong mi, Cheri, mo famli blong mi i kam nogud. Mi gohed blong go long jos, be hem i blong soem mi nomo mo traem blong kipim famli blong mi i stap tuge-ta. Laef i olbaot nomo. Mi no save filim Spirit mo askem miwan sapos yes o no se mi bin filim Tabu Spirit tru.

Taem bigfala boe blong mi, Kayson, i stap lego mifala blong go long misin blong hem, mi pulum wan dak klaod i kavremap taem ia we i sapos blong stap olsem wan hapi taem. Afta long tu yia, fulap long famli blong mi i save wanem mi stap go tru long hem. Taem olgeta evri wan i go long tempol wetem Kayson blong fas taem blong hem, mi no bin stap.

Truaot long taem ia, mi filim mi stap miwan tumas.

### Sapot I Raonem Mi

Wan dei ol brata blong mi oli kam tugeta blong toktok long mi abaot wanem mi stap go tru long hem. Mi no bin tingbaot gud tumas wanem oli talem, be mi save se oli mekem from lav blong olgeta long mi. Taem mifala i stap

# Taem Mi Filim se Oli Bin Giaman long Mi Abaot Jos

*From wanem mi bin go. Mo from wanem  
mi bin kambak.*



toktok, mi stat blong kam blong luksave wanem mi stap mestem. Hemia i kam wan strong pus long mi blong jenis. Mi nao mi sapos blong odenem Kayson olsem wan elda. Mi nao mi sapos blong karem hem tru long tempol. Mi nao mi sapos blong givim hem wan blesing blong papa bifo hem i go long misin. Fulap long ol impoten taem long laef blong hem, i sapos blong mi nao blong stap long taem, be i no wan nara man. Mi tingbaot we mi stap askem miwan se,"?Mi stat mekem wanem?"

I no longtaem afta, wan gudfala fren i kasem inspere-sen blong introdiumsum mi long wan memba blong stek presidensi blong hem. Man ia we i kaen i lisin gud long stori blong mi mo i luk olsem hem i save wanem bae mi talem bifo we mi talem. Mitufala i toktok blong plante aoa. Stori blong mi, ol kwestin blong mi, fasin blong tingting ia we stat tingting long hem i semmak fulap long wanem ol nara wan oli serem wetem hem. Mi stat blong kam blong luksave se i gat ol ansa we i gat mining long ol fulap wari mo fulap kwestin blong mi, we nomata we oli tru, oli stat

mo i gat from ol pipol we oli wantem stap damejem fet.

?I kwiktaem nomo blong ansarem mo stretem evri kwes-tin mo wari blong mi? No, o yes, no. Be hat blong mi i kam sopsop inaf blong luksave wan bigfala mo gudfala trutok: ol kwestin oli gud, be sam kwestin oli moa impoten bitim ol nara wan.<sup>1</sup> ?I inaf blong lusum famli blong mi mo blong stanap long fored blong God from sam kwestin we oli no ansarem? Taem mi lukluk moa faswan long ol kwestin we oli moa impoten mo putum bak God long fas ples insaed long hat blong mi, mi stat blong faenem ol ansa we i talem bake-gen wetem strong tingting se mi stat kambak long stret rod.

Stek presiden mo bisop blong mi tu, oli kamaot blong helpem mi. Oli wan gudfala mo bigfala help long mi mo Cheri long ol taem blong tudak. Oli neva givap. Olgeta mo famli blong mi long tugeta saed blong vel oli ol gudfala tul blong stat helpem mi. Mi save se Papa long Heven i save mo i lavem yumi. Hem i putum ol pipol long rod blong yumi taem yumi nidim olgeta. Yumi jes nidim blong gat gladhat blong akseptem help blong olgeta.

## Wanem blong Mekem Sapos Hemia I Yu

Mi save se i gat ol nara wan i stap we maet oli stap go tru wan samting we i kolosap semmak olsem. Maet hem iyu o wan we yu save.

mi save se Sevya i bin stanemap Jos blong Hem wetem atoriti blong save givim ol odinens mo kavenan we yumi nidim blong gobak long Hem. Setan i stap wok ova taem blong talem nogud Jos blong Lod taem i stap yusum evri wei we i posibol. Blong stap gat ol kwestin mo mekem ap ol tu tingting i isi. Blong foldaon insaed long ol trap blong hem, i save hapan long eniwan. Blong stap dipen long infomesen mo ol ansa we ol nara wan i givim i stap olsem wei we i isi moa blong stap faenemaot trutok blong yuwan “tru long stadi mo *tu*, tru long fet” (Doktrin mo Ol Kavenan 88:118; oli ademap long italik). Be antap long evri samting, hemia nao wanem God i nidim.

Sapos yu stap fesem hadtaem wetem ol kwestin o gat tu tingting abaot Jos o fet blong yu, bae yu faenem trutok taem yu stap rid long ol websaet o stap lisin long rekoding long olgeta we oli no agri wetem Jos o oli bin lego Jos. Be tu, bae yu no



Taem mi lukluk moa long ol kwestin faswan we oli moa impoten mo putumbak God long fas ples insaed long hat blong mi, mi stat blong faenem ol ansa we oli bin talem bakegen long mi wetem strong tingting se mi bin stap kambak long stret rod.

harem se i inaf wetem ol ansa we oli no hevi, mo maet bae yu no laekem tingting ia blong “putum ol kwestin blong yu long self.”

Mi bin lanem se, oltaem yumi no save laef long laet we yumi boro long hem, be, yumi mas tanem yumi i go long God we i ples blong evri laet mo trutok (luk long Doktrin mo Ol Kavenan 93:26). Yumi mas stadi gud long hem insaed long maen blong yumi, be tu, yumi mas askem long God sapos wanem yumi stap tingting long hem i raet (luk long Doktrin mo Ol Kavenan 9:8). Yumi mas lan blong yumiwan, olsem we Josef Smit i bin mekem (luk long Josef Smit—Histri 1:20) mo gat fasin blong save stap wet longtaem long wanem yumi stap lukaotem (luk long Alma 32:41). Be blong stap lan wetem fet i minim se yumi mas pruvum trutok ia taem yumi stap laef folem (luk long Jon 7:17; 1 Tesalonaeka 5:21).

taem mi stap stadi ol samting we i go agensem Jos, mi filim olsem mi stap long medel blong tudak (luk long 1 Nifae 8:23–24; 12:17). Taem mi holemaet tok blong God mo tekem fas step ia i go long Hem, hemia i evri samting Hem i bin nidim blong sendem Spirit blong Hem blong tajem hat blong mi.



## OL KWESTIN WE I NO GAT ANSA VESEM OL DOKTRIN WE YU SAVE GUD

“Mi save laef wetem sam wetem sam fasin we oli no stret evriwan; mi save laef olsem iven long medel blong ol profet blong God—hemia i wanem i stap wetem evri man mo woman blong wol ia. Mi save laef wetem sam samting we oli faenem long saed blong saens we i no folem wanem Buk blong Momon i talem, mo taem bae i stretem olgeta samting ia. Mo mi save laef wetem sam samting long histri we oli no go tugeta; oli smol samting tumas komperem long longfala mo ful trutok ia. Be mi no save laef sapos mi no gat ol tru doktrin ia mo ol odinens ia we Josef Smit i bin putumbak; mi no save laef sapos i no gat pris-hud blong God blong blesem famli blong mi, mo mi no save laef sapos mi no save se waef blong mi mo ol pikinini blong mi oli sil long mi blong taem we i no save finis. Hemia joes we yumi stap fesem—sam kwestin nomo we i no gat ansa long wan han, mo long nara han, wan bigfala hip blong ol trutok we yumi save gud mo paoa blong God.”

Elder Tad R. Callister i bin stap insaed long Presidensi blong Olgeta Seventi taem hem i bin givim toktok ia, “What Is the Blueprint of Christ’s Church?” [Jos Edukesen Sistem divosen blong Ol Yang Adalt, Jan. 12, 2014], broadcasts.ChurchofJesusChrist.org.

## ?Hop i Inaf?

Sam wik afta we Kayson i bin aot blong go long misin blong hem, stek presiden blong mi i bin visitim mi. Mi mekem hem i kaj ap long wanem i bin hapen long ol wik ia afta we ol brata blong mi oli bin toktok wetem mi. Mi talem mi wantem blong gat wan niu tempol rekomen. Hem i askem sapos mi save ansarem gud ol kwestin blong rekomen. Mi konfes: "Presiden, mi no ting se mi save talem yet se Jos i tru, be mi hop tru wetem ful hat blong mi se hem i tru. Mo bae mi stap lidim laef blong mi folem hop ia. ?Hemia i inaf?"

Hem i stop smol taem mo talem: "Travis. Hemia bae i inaf oltaem."

I gat sam samting we mi stap wet yet blong andastanem, be sam samting oli kam klia long mi. Mi save Papa long Heven i lavem mi. Mi save se samtaem bae yumi wokbaot i go defren mo yumi gat hadtaem blong smol taem. Be mi save se tru long Kraes, Atonmen blong Hem, mo hop we hemia i tekem i kam, hem i posibol blong gobak long rod ia we i lidim yumi i gobak long Hem. ■

*Hem we i raet i stap long Yuta, YSA.*

### NOT

1. Luk long Lawrence E. Corbridge, "Stand Forever," (Brigham Young University devotional, Jan. 22, 2019), [speeches.bry.edu](https://speeches.bry.edu).

## AEDIA BLONG STAP HELPEM WAN WE YU LAVEM

Olsem mi, plante pipol we oli gat ol kwestin o tu tingting oli filim olsem se oli no pat blong Jos. Be yumi no save letem blong yumi klosem doa long olgeta o ol narawan. Sevyia i bin givim komanmen long ol pipol blong Hem blong "gohed blong givhan" long olgeta from se yumi neva save se wetaem bae oli kambak long Hem mo kam oraet bakegen (luk long 3 Nifae 18: 2232).

Hemia faef wei we yumi save gohed blong givhan long olgeta we oli stap faet wetem ol tu tingting blong mekem se oli filim se oli welkam, i nomata se oli jusum o no jusum blong kambak.

1. **Gohed blong lavem man.** Truaot long ol faet insaed long tingting blong mi, mi bin filim se mi bin stap miwan. Yes, Papa long Heven i no bin givap long mi, mo famli blong mi tu, o ol lida blong Jos tu. Blong stap filim lav blong Hem tru long olgeta i bin helpem mi blong save se mi save gobak.
2. **Gohed blong go aot mo helpem man.** Blong stap lavem ol man, i no sapos blong i dipen long wanem oli bilif long hem, long hamas oli tekpat long Jos, o iven hao oli filim abaot yumi. Jisas i askem yumi blong go aot mo helpem moa olgeta we oli stap aotsaed long sekol blong yumi (luk long Matiu 5:4647).
3. **Gohed blong hop.** Yumi livim kaekae, yumi prea, yumi lukaot gud mo wet wetem fasin blong wet longtaem, mo yumi neva givap blong stap hop. "God i putum ol rod i stap blong sevem wanwan long ol pikinini blong Hem." (Henry B. Eyring, "To My Grandchildren," *Liahona*, Nov. 2013, 71).
4. **Respektem fridom blong joes blong olgeta.** Gat hop be respektem desisen blong olgeta. Yumi no nid blong winim tingting blong olgeta o raorao wetem olgeta. Olsem pikinini ia we i lus mo i kambak, plante long yumi i nidim sam samting blong i hapen insaed long laef we bae i mekem hat blong yumi i sofsof fastaem.
5. **Tritim olgeta wetem bigfala respek, be i no olsem se oli ol man nogud.** No talem ol toktok we i givim jajmen, i poenem fingga, o i daonem olgeta. Ol pipol we oli gud oli gat ol bilif se oli defren long hemia blong yumi, mo yumi mas givim semfala respek ia we yumi stap hop se bae oli givim long yumi.



Mi no ting se mi save talem se mi save se Jos i tru yet, be mi hop se i tru mo bae mi laef folem hop ia.

# Stap Pikjarem long Maen, Ol Paeonia blong India

I kam long Taunalyn Rutherford

Wan profesa blong Relijin Edukesen long Brigham Yang Yunivesiti

Taem mi mitim  
ol paeonia  
blong Jos long  
India, i bin jeni-  
sim wei we mi  
stap pikjarem ol  
paeonia.

“E vri taem, taem mi tingbaot ol paeonia,”  
olsem singsing blong Praemer i talem,  
“mi stap tingting long ol woman mo  
man we oli no gat fraet.”<sup>1</sup> Ol stori blong ol  
Lata-dei Sent paeonia we oli bin gotru mo  
winim ol hadtaem blong fet, oltaem i givim  
insperesen long mi. Olsem wan yang mama,  
ol stori blong ol paeonia woman i stap  
rimaenem mi long ol lata-dei blesing blong  
mi. !Mi save bonem wan bebi insaed long  
wan hospital bitim wan han kat!

Mining blong wan paeonia olsem “wan  
we i go fored blong mekem rere openem

rod blong ol narawan blong folem”<sup>2</sup> i  
tokbaot gud Ol Lata-dei Sent paeonia long  
rod blong kat mo han kat we oli stap kam  
tugeta long Saeon. Be tu, i tokbaot gud ol  
paeonia blong tedei mo ol hadtaem blong  
fet we oli gotru long hem raonem wol.

Taem ol faef pikinini blong mi oli enrol  
long skul, mi statem ol graduet stadi blong  
mi long histri blong religijn. Mi bin jusum  
blong stadi long Jos Ia blong Jisas Kraes  
Ia blong Ol Lata-dei Sent long India olsem  
topik blong projek blong mi blong kasem  
PhD blong mi. Stadi blong mi long India



Oli stanemap wan misin long Bangalore long 1993, mo bae oli bildim wan tempol long ples ia i no longtaem.

i bin jenisim wei we mi stap pikjarem ol paeonia.

### Ol Strong Pos blong Jos

Sam yia bifo, olsem wan yang kolej studen long 1986, mi bin travel i go long Saot Esia wetem Ol Yang Ambasada blong Brigham Yang Yunivesiti. Hem i wan eksperiens we i jenisim laef we insaed long hem tu, i gat wan dei blong spendem long Kalkuta (we naoia oli singaotem Kolkata) wetem Mama Teresa. Mi hapi semmak tu, blong save Ol Lata-dei Sent we oli ol paeonia blong tedei long India mo Sri Lanka.

Wan long ol memba ia hem i Raj Kumar, we i bin faenem Jos taem hem i bin go long wan so blong Ol Yang Ambasada blong BYY (Brigham Yang Yunivesiti) long 1982. Taem mifala i luk hem, hem i jes kambak nomo long misin blong hem long Fresno, Kalifornia, YSA. Hem i stap werem misinari nem tag blong hen yet mo i stap gohed blong tijim eniwan long Delhi we bae i wantem lisin. Raj i wan long ol ol 600 memba long India long taem ia, be long mi, i luk olsem hem i hemwan Lata-dei Sent long wan solwota blong hundred blong milian blong ol pipol.



Long 1986, mi bin mitim Raj Kumar afta long misin blong hem. Hem i stap werem misinari nem tag blong hem yet mo i serem gospel long eniwan we i wantem lisin.



Ol brata mo sista blong Suvarna mo Sarala Katuka oli joenem Jos long 1984 mo afta oli bin go long ol misin.

Mi bin kasem insperesen tru long eksampol blong Raj Kumar taem mi bin jusum blong go long wan misin. Raj tu, i bin gotru wan hadtaem blong fet blong sam long ol fas Indien manples misinari blong mekem misinari long kantri. Suvarna Katuka mo ol nara misinari oli bin kasem sam misinari trening long Jenae. Misin presiden blong olgeta, we i stap long Singapua, i givim wok long Raj blong givim sam moa trening long olgeta long Delhi.

Suvarna Katuka i tingbaot olsem wanem misinari wok blong olgeta i bin jenis from eksampol mo trening blong Raj Kumar. Oli bin save mekem fet mo strong tingting i kam moa strong lon ples blong ol filing blong fraet. Suvarna i eksplenem se, "Mi ting se taem ia nao tru fasin blong jenisim laef i go long Lod i bin stat. Mi filim Spirit blong Tabu Spirit., mo long taem ia nao mi disaed blong help blong bildim kingdom long ples ia India."<sup>3</sup>

Suvarna i bin joenem Jos long Rajahmundri. Hem, tugeta wetem faef brata mo wan sista i bin kasem baptaes long 1984. Long dei blong baptaes blong hem, oli odenem hem wan pris mo setem hem apat olsem nambatu kaonsela blong branj presidensi. Oli bin promesem hem tu, long wan blesing blong hem se sapos hem i gohed blong stap fetful, bae hem i stap olsem wan "strong pos blong Jos long India."

Sista blong Suvarna, Sarala tu, i bin go long wan misin. Bifo hem i go, hem i introduisum gospel long fren blong hem Swarupa. Taem Suvarna i kambak long misin blong hem, hem i kasem blesing from misinari



*Ol Elda, Kandavalli, Sharma, Katuka, mo Raju.*



*Famli blong Elsie mo Edwin Dharmaraju long dei we oli bin kasem baptaes.*

Seves blong fulap  
Jos memba we  
oli givim olgeta  
fulwan long hem i  
bin mekem olgeta i  
kam ol strong pos  
blong Jos.

wok blong sista blong hem mo i maredem Swarupa. Smol branj ia long Rajahmundry naoia i kam wan stek. Plante misinari we oli kambak long Rajahmundry oli kam ol lida long Jos traot long India.

Mi bin mitim ol pikinini blog Suvarna mo Swarupa Katuka taem mi stap tij long BYY long 2014. Josh Katuka i bin finisim misin blong hem long Bangalore long India i no long taem, mo sista blong hem Timnah i jes kasem misin kol blong hem blong go long semmak misin. Taem mi askem Timnah mo Josh sapos oli bin save Raj Kumar, tufala i talem, “!Yes, hem i anggel blong mitufala!” Raj Kumar i maredem Sarala.

Mi talem tangkyu tumas long famli Katuka blong introdusum mi long sam nara paeonia taem oli stap helpem mi blong travel long India. Fulap long olgeta i folem bak ol rod blong paeonia blong olgeta i gobak long lav mo eksampol blong famli Katuka. Long wan taem, Suvarna mo Swarupa i bin gat janis blong muv i go long Kanada. Be oli no bin akseptem from oli filim se Lod i nidim olgeta blong stap long India mo bildim kingdom blong God long we. Seves blong olgeta we oli givim olgeta

fulwan long hem i bin mekem olgeta i kam ol strong pos blong Jos.

#### **Ol Paeonia long Bengaluru mo Hyderabad**

Long las haf blong namba 20 senturi, oli bin stanemap Jos long ol defdefren siti long India tru long ol paeonia memba.<sup>4</sup> Wanwan stori i soemaot olsem wanem Lod i bin stap lidim ol pipol i go long gospel ia we i kambak long wol.

Michael Anthoney, wan paeonia memba long Bangalore (we naoia hem i Bengaluru), i joen wetem wan Jos memba long 1970 olsem wan merikel. Taem Delwin Pond, wan bisop long Yuta, i bin go long wan wan dokta blong meresin from so long bak, mo hem i bin luk wan atikol long magasin long ofis blong dokta ia blong wan oganaesen we i stap sponsarem ol studen long India. Hem i filim wan strong voes blong sapotem wan long ol studen ia. Hemia i lidim hem blong raetem leta haedhaed, gogo kasem taem we famli Pond i mekem kontak wetem Michael mo serem gospel wetem hem. Michael i bin kasem baptaes long 1981 mo go long wan misin long Sol Lek Siti long 1982. Hem i kambak long haos eli from mama blong hem i bin sik tumas, mekem



*Delwin Pond (long medel) i introdiusum Michael Anthony long Jos long 1981.*



*Hyderabad, i wan siti blong ova long 8 million pipol mo hom blong fas stek long India.*

se hem i mekem ol las tri manis blong misin blong hem long Bangalore, long ples ia hem i tijim sam long ol fren blong hem mo ol nara wan we oli kam ol memba blong fas branj long we.<sup>5</sup> Naoia i gat ol plan i stap blong bildim wan tempol long Bengaluru.

Elsie mo Edwin Dharmaraju i bin joenem Jos long Samoa mo Presiden Spencer W. Kimball i singaotem tufala blong gobak long hom blong olgeta long Hyderabad olsem ol misinari long ol famli blong olgeta. Long 1978, 22 famli memba blong Elsie mo Edwin i bin baptaes, mo olsem nao fas stek blong kantri i bin oganaes long Hyderabad long 2012.<sup>6</sup>

Ol memba blong stek blong Hyderabad oli lukluk olgetawan olsem ol lata-dei paeonia. Ol stek selebresen blong Paeonia Dei i makem wetem respek, ol rod blong olgeta we oli bin wokbaot long hem mo tu, ol rod blong ol paeonia blong tedei. Long ol selebresen ia i gat tu ol grup danis, ol longfala had wokbaot, mo iven blong ron long ol han kat.

Long selebresen blong Paeonia Dei blong olgeta long 2014, oli putum ol blok blong aes long wan laen biaen long jos mo invaetem ol memba blong karemaot ol sus blong olgeta mo wokbaot krosem aes, wetem tingting i go long ol paeonia blong fastaem mo olsem wanem oli bin stap krosem ol reva blong aes. Long en

blong selebresen blong olgeta, ol memba blong Hyderabad stek oli lef-temap tingting blong olgeta blong tingbaot spirit blong ol paeonia blong bifo mo we “olgeta evriwan oli ol paeonia blong ol famli blong olgeta.”<sup>7</sup>

Oli bin lisin tu, long John Santosh Murala, we i bin wok long misin presidensi long taem ia, hem i tokbaot olsem wanem anti blong hem Elsie mo Edwin Dharmaraju i bin kam long Hyderabad blong tijim famli blong olgeta abaot gospel. John i wan long ol 22 paeonia memba we i moa yangfala long olgeta, we i kasem baptaes long 1978.

Taem mi bin visitim Hyderabad long 2014, John Murala i talem long mi stori blong hem mo fulap long ol Jos histri we hem i stap putum tugeta. Hem i introdiusum mi long waef blong hem tu, Annapurna, we i talem long mi wan long ol Lata-dei paeonia stori we i gat fulap paoa we mi neva harem bifo.

Annapurna i gat 12 yia long 1991 taem tu misinari long Hyderabad i bin tijim brata blong Murthy. Papa mo mama blong Annapurna i bin



*Annapurna mo John Murala, we oli ol paeonia memba long Hyderabad, oli soem olgeta we oli stap help wetem wan rod han kat we bae oli aktem baken mo long dei ia, oli bin sil long Hong Kong Tempol.*



*Ol memba blong Hyderabad stek oli makem wetem respek, Paeonia Dei tru long singsing, danis, mo iven ronron long han kat.*



*Stek senta blong Hyderabad India we Stek Presiden Dallin H. Oaks i bin oganaesem long 2012.*

Ol Jos memba long India oli luk olgetawan olsem ol paeonia blong famli blong olgetawan, taem oli traehad blong laef folem gospel.

letem hem blong lisin long ol misinari o go long jos. Be, Murthy i bin givim wan Buk blong Momon long hem mo oltaem givim ol riding blong Jos long hem blong ridim. Blong seven yia, Annapurna i bin stadi gospel hemwan mo kasem wan strong testemoni blong trutok blong hem. Hem i stap drim blong kasem baptaes, go long wan misin, mo mared long tempol, be papa mo mama blong hem i no givim raet.

Annapurna i bin fesem wan had desisen long laef blong hem taem hem i kam blong save John Murala. John i gohed blong stap strong long testemoni blong hem stat long taem we hem i kasem baptaes long 1978, mo i stap lukaot wan memba blong Jos blong maredem. Afta long wan sot miting we Annapurna i bin serem testemoni blong hem abaot gospel, John i gat strong tingting se hem i jes mitim fiuja waef blong hem. Annapurna i save se sapos hem i maredem John, bae hem i save kasem baptaes mo wan dei, sil long tempol. Be, long semmak taem ia, papa mo mama blong Annapurna

oli stap planem blong arenjem wan mared blong hem.

Annapurna i bin mekem had desisen ia blong lego hom mo maredem John. Hem i filim se hemia i wei ia nomo we hem i save joenem Jos. “Hat blong hem i brok” tumas blong lego papa mo mama blong hem. Be iven tedei, hem i talem strong, “Mi mas tekem step ia blong fasin ia blong sevem evri man, . . . blong gud blong mi mo blong papa mo mama blong mi mo ol bubu blong olgeta, blong save mekem tempol wok blong olgeta.”<sup>8</sup>

John mo Annapurna tufala i talem tangkyu tumas se naoia papa mo mama blong hem i akseptem mared blong tufala. Fulap memba long India oli bin mekem ol sakrifaes, sem-mak olsem ol paeonia blong bifo, blong save kam ol memba blong jos. Be yet, Ol Sent ia oli muv i go fored wetem fet from oli luk olgetawan olsem ol paeonia mo ol laen ia we i save joenem ol famli blong olgeta long tugeta saed blong vel. Mi laekem tumas ol fulap stori blong fet, sakrifaes, mo strong tingting blong no fraet we mi bin harem long ol



*Artis i mekem wan pikja blong Bengaluru India Tempol. Long ples ia bae i gat tu, wan miting haos, wan distribiuseñ senta, Ol Jos Ofis, mo haos blong silip blong olgeta we oli stap kam blong go long tempol.*

memba we oli stap gotru ol hadtaem long ol ples we gospel i niu long hem. Mi stap tingbaot yet ol paeonia we oli stap pulum ol han kat mo krosem ol reva blong aes, be naoia mi save pikjarem ol paeonia blong tedei long India mo evri ples long wol.

Tugeta mo antap long evri samting, evri rod blong paeonia we wanwan man o woman i bin gotru long hem from oli stap folem ol fasin blong Sevya Jisas Kraes we Hem i bin soem i stap. Long Niu Testeman, oli singaotem Kraes se Hem i “lida blong olgeta ya we God i wantem sevem olgeta” (luk long Hibrus 2:10). Jisas Kraes i bin rere long wan rod blong yumi blong gobak long hom blong yumi long heven.

Ol tru paeonia oli folem mo lidim yumi i go long Kraes, we Hem i stap lidim gudfala mo bigfala wok long ol las dei ia. ■

#### OL NOT

1. “Whenever I Think about Pioneers,” *Children’s Songbook*, 222–23.
2. *Oxford English Dictionary* (1971), “Pioneer.” Luk tu, long Thomas S. Monson, “Led by Spiritual Pioneers,” *Liahona*, Aug. 2006, 3.
3. Suvarna Katuka, histri we oli storian long hem long wan intaviu we i kam long Taunaly Rutherford, Mei 2014, Delhi, India.
4. Yu save faenem fulap long ol paeonia stori blong India long seksen blong Jos Histri long Gospel Laebri andanit long “Global Histories.”
5. Luk long “A History of the Church in India,” comp. Jerry C. Garlock (unpublished, 1995), 49–50.
6. Luk long “I Will Establish a Church by Your Hand,” history.ChurchofJesusChrist.org.
7. Luk long “Hyderabad Stake Pioneer Day Activity,” lds.org.in/hyderabad-stake-pioneer-day-activity.
8. Annapurna Guru Murala, histri we oli storian long hem long wan intaviu we i kam long Taunaly Rutherford, Hyderabad, India, 7 Mei 2014. Luk tu, long Rochelle Welty mo Jan Pinborough, “God Had His Own Plans for Me,” *Liahona*, Apr. 2003, 30–32.

# Yu Lavem, Hem I Sevem

*Yumi prea se bae hat blong ol pikinini blong yumi bae i jenis.  
Mo afta yumi no filim gud tumas taem yumi kam blong luksave  
(mo i mekem yumi fri).*

I kam long Krista Rogers Mortensen

**H**asban blong mi mo mi i bin tijim ol pikinini blong mitufala long gospel. Mifala i gat skripja stadi evri moning, famli prea, mo famli haos naet evri wik. Mifala i bin go long jos tugeta, kakae tugeta, mo go long ol famli holidei. Ol pikinini blong mitufala i bin go long tempol oltaem blong mekem baptaes blong ol ded man, oli bin graduet long seminari, mo tu long olgeta i bin go long misin.

Mo afta, olsem ol adalt, oli bin stat blong wokbaot long ol rod mo tingting we oli defren long ol samting we mitufala i bin tijim olgeta. Wan afta wan, ol pikinini blong mitufala i stop blong stap tekpat long Jos kasem taem wan nomo aot long ol faef pikinini blong mitufala, i jusum blong kam long Jos. Mifala i bin krai fulap from ol pikinini blong mitufala mo askem mitufalawan sapos mitufala i no bin stap olsem ol gudfala papa mo mama o, sapos i gat wan samting we mitufala i save mekem i defren we mitufala i no mekem.

Blong wan longfala taem, mitufala i bin krae long Lod blong i jenism hat blong olgeta, mo afta, Lod i bin ansarem ol prea blong mitufala.

Be i no long wei we mitufala i stap tingting long hem.

Hem i soem long mitufala se mitufala i nid blong stat taem mitufalawan i jenism hat blong mitufala be i no blong jenism hat blong ol pikinini blong mitufala nomo. Taem ol papa mo mama i stap mekem wan impoten wok blong stap tijim ol pikinini blong olgeta, Hem i rimaenem mitufala se Jisas Kraes i Sevya mo Jaj blong olgeta.

Wetem strong tingting blong sevem ol pikinini blong mi, mi putum fulap taem blong mi blong stap prea, ridim ol skripja blong mi, mo go long tempol mo tingting se sapos mi mekem evri samting we i stret, bae mi kwaliae blong God i save kam insaed long ol hadtaem blong mi—olsem se mi hop se ol aksen blong mi bae i lidim God blong tekova long paoa blong olgeta blong jusum mo fosem olgeta blong biliv olsem we mi biliv.

Hasban blong mi mo mi i bin wantem tumas blong sevem olgeta, be wei we mitufala i lukluk blong sevem olgeta i luk moa olsem blong stap toktok fulap, hambak, o soem hamas mitufala i no agri long ol joes blong



olgeta, we i lidim mifala i go stret long fasin blong raorao. Mitufala i luksave se fasin blong mitufala blong wantem tumas blong karembak ol pikinini blong mitufala, i stap pusumaot olgeta moa long mitufala. Taem oli stap filim mitufala i stap jajem olgeta mo no glad long olgeta, moa oli stap stap longwe long mitufala.

Ol prea blong mi i jenis i go long wan krae blong hat blong miwan i jenis. Mi kam blong luksave se ol risen blong mi blong stap wantem ol pikinini blong mi blong jenis i bin kam long wan rong ples. Mi prea blong moa lav. Mi prea tu, blong winim ol filing blong sem se famli blong mi i no luk semmak nating long ol famli ia we oli stret evriwan we ol fren blong mi i stap soem long sosol media wetem ol foto blong ol pikinini blong olgeta we oli mared long tempol o ol baptaes blong ol pikinini bubu blong olgeta.

Taem mi tanem mi i go long Sevya blong kasem hiling, hat blong mi i stat blong kam sopsop long ol pikinini blong mi. Mi kam blong luksave se blong lavem olgeta olsem we Hem i lavem olgeta i minim blong mekem sam jenis. Long Hem, lav i no olsem wan wei—hem i wan samting we i pusum tingting blong Hem blong mekem evri samting we Hem i stap mekem. Hem i bin talem se Hem i no bin mekem “eni samting sapos i no blong helpem wol; from hem i lavem wol” (2 Nifae 26:24).

Blong stap trastem paoa blong Sevya blong save mekem wok blong Hem (luk long 2 Nifae 27:20) i bin mekem mi blong save lukluk nomo blong stap lavem ol pikinini mo tanem pat ia blong sevem olgeta i go long Lod. I no bin minim se mi givap blong stap traem blong helpem olgeta, be taem blong stap lavem olgeta i kam olsem fos blong paoa biaen long ol fasin we mi stap mekem samting wetem olgeta, i bin jenism *olsem wanem* mi stap mekem samting wetem olgeta.

Mi stat blong luk olgeta long wan defren laet. Mi stat blong stap lukluk moa long ol paoa blong olgeta mo ol talen blong olgeta mo stat blong luk olsem wanem oli ol gud pipol we oli gat lav mo stat givim samting wetem glad hat.

Hasban blong mi mo mi, i lisin moa mo no toktok tumas. Mitufala i askem ol kwestin abaot laef blong olgeta mo ol intres blong olgeta. Mifala i soem intres long olgeta be i no jajem olgeta. Mitufala i putum ol fasin blong lav long ples blong talem nogud mo no glad, mo ol pikinini blong mitufala i save filim tru.

## Wanem I Bin Helpem Mi

### prea

wan krae blong hat blong mi blong jenis



### lukluk wetem tingting

stap luk ol pikinini blong mi long wan defren laet



### lav

no toktok  
nomo—lisin tu



### tras

ol hadwok blong mi i stap olsem patna wetem hemia blong God

Hom blong mifala i kam wan ples we oli save filim lav mo filim se oli save akseptem olgeta olsem we oli stap. Oli stop blong haedem ol samting long mitufala mo oli stat blong stap ones mo open abaot wanem i stap gohed long laef blong olgeta. Mifala i kam moa kolosap.

Famli blong mifala i wan wok we i stap gohed yet be ol pikinini blong mitufala i laekem blong stap kam long hom blong mifala mo pasem taem wetem mitufala naoia. Oli filim oli sef long fored blong mitufala, mo tru long lav blong mitufala, mi hop se bae oli save filim lav blong God long olgeta. Mi no bin save sapos bae hem i long laef ia o no we bae oli kambak long ol samting we oli bin tijim olgeta taem oli ol pikinini, be mi save se oli stap long han blong Sevya. ■  
*Woman we i raet i stap long Yuta, YSA.*

# Oli Putum Ol Hadtaem blong Olgeta long Saed

I kam long Natalie Jones, Yuta, YSA

*Long dei ia, Kendra, Brent, mo Tyson oli bin ol tru eksampol blong stap givhan olsem Kraes i mekem.*

Yumi evriwan i eksperiensem ol antap mo daon long laef, be 2013 i wan yia we i bin had lelebet blong famli blong mifala. Mifala i bin eksperiensem fulap samting we mifala i no luk i stap kam mo ol ripea blong haos mo trak we i sas tumas. Hasban blong mi Ryan, i bin lusum wok blong hem, mo las bon bebi boe blong mifala i bin bon wetem sam problem mo i mas stap blong sam wik long andanit long glas blong oli lukaot gud long hem. Mi tu, mi bin fesem hadtaem blong stap wari mo taet from bebi. Ol situesen ia, tugeta wetem blong stap olsem papa mo mama blong fo yangfala pikinini, i bin mekem i had bigwan long mifala long saed blong mane mo ol filing.

Ryan i bin faenem wan niu wok, be hem i stap wok long ol longfala aoa mo fulap taem hem i stap aotsaed

long taon blong ol wik afta bakegen. Boe blong mi we i gat faef yia, Wesley, i stat blong stap wari mo harem nogud from papa blong hem i stap aot oltaem. Fulap taem hem i stap wekap long naet from ol nogud drim.

Famli blong mi we i no kolosap tumas long mi i stap help taem oli save mekem, be mi stap filim taet mo miwan yet fulap taem. Mi save se Papa long Heven i lavem mo save abaot famli blong mi, be mi filim se mifala i stap draon.

Wan afterun, taem Ryan i stap aot long taon blong wok, mi bin draevem ol pikinini blong mi long skul blong kambak long haos mo mi bin prea strong from help. Afta long naet ia, neba blong mi Kendra i noknok long doa blong mifala. Hem i bin save abaot situesen blong mifala mo i


askem sapos mi oraet. Mi nogat tingting blong komplen long hem, mo hem i las man we bae mi save askem help long hem. Hasban blong hem, Brent, i bin stap faetem kansa blong fo yia we i bin pas.

Mi bin talem long Kendra se mi oraet, be hem askem wetem tru hat bakegen sapos mi oraet. Wota i fulap long ae blong mi, mo mi talem hat blong mi long hem abaot ol hadtaem blong mi. Taem mi bin talem long hem abaot wari mo harem nogud mo nogud drim blong Wesley, hem i bin askem sapos mi wantem Brent blong givim wan blesing long Wesley.

I no long taem afta, Kendra, Brent, mo bigfala boe blong tufala, Tyson, i kam long doa blong mifala mo oli jenis long klos blong jos. Brent i wik long bodi. Mi save se i tekem evri paoa blong hem blong kam long haos blong mifala. Hem i givim wan blesing long Wesley, mo Tyson i givim wan blesing long mi.

Long dei ia, Kendra, Brent, mo Tyson oli bin ol tru eksampol blong stap givhan olsem Kraes i mekem. Oli bin putum ol hadtaem blong olgeta long saed mo wetem tru hat, oli givim lav mo sore long mifala. Mi bin filim blesing se Papa long Heven i bin ansarem prea blong mi long gudfala wei ia. Brent i ded tu wik afta.

Long dei ia long hom blong mifala, Brent i bin stanap olsem wan witnes blong God taem we hem i stap yusum prishud wetem stret mo gud fasin (luk long Mosaea 18:9). Long mi, givhan blong hem long famli blong mi i tabu from i bin wan long ol las wok blong hem we hem i bin mekem long wol. ■



# Man blong Plen We i No Fraet

I kam long Wayne L. Bell, South Dakota, USA

*I no gat wan man we i no fraet i wantem ansarem ofisa we i stap trenem mifala, be sek nomo se, wan yangfala man i putum han blong hem i go antap.*

Fulap yia i pas, mi bin joenem Yunaeted Stet Ea Fos blong wok blong kantri blong mi. I no long taem mi faenem miwan long wan kamp blong strong trening blong militeri long Teksas, YSA. Ol wik i pas sloslo taem mi stap strong blong go tru long fulap samting we i nomol blong wan i eksperiensem long strong trening kamp.

Wan dei mi bin go long wan bigfala miting blong ova long 200 man blong flae long plen, we evriwan i stap long semmak trening olsem mi. Miting i stap wetem wan long ol ofisa blong trening—we oltaem i singaot laod wetem ol strong lanwis—i stap singaot, “I gat wan we i no agri long wei we mi stap mekem ol samting raon long ples ia?”

O yes, i no gat wan man i wantem ansa, be sek nomo, wan yangfala man i putum han blong hem i go antap.

“!Man blong plen, stanap!” ofisa ia i singaot. “?Wanem nao yu no agri long hem?”

Mifala i lisin gud taem yangfala man ia i talem strong se: “Mi no agri long yu blong stap talem nem blong Sevya blong mi olbaot. I mekem sol blong mi i harem nogud. Mi wantem askem yu blong stop.”

I nomo gat noes long rum. Ofisa ia i lukluk hem mo afta i askem se hem i blong wanem religijn. Man blong plen we i no fraet i talem wetem bigfala glad, “!Mi mi wan memba blong Jos Ia blong Jisas Kraes blong Ol Lata-dei Sent!”

Ofisa i talem tangkyu long man blong plen ia from strong tingting blong toktok, mo miting i bin gohed.

Aksen ia i bin gat wan bigfala paoa long mi. Samtaem mi tingting long miwan se mi wantem blong gat kaen strong tingting olsem we man blong plen ia i bin gat.

i no fraet. Waef blong mi mo mi i bin mit wetem ol misinari, mo i no long-taem nomo mitufala i baptaes.

Sam manis afta, mi mekem ol misinari oli visitim smol brata blong



Afta long strong mo medikol trening ia, oli asaenem mi long wan ami blong plen long Kolorado, YSA. Wan dei, mi kasem wan leta long bigfala boe blong mi we i stap wol long Filipin. Hem i bin joenem ami blong plen samples wan yia bifo mi. Hem i talem long mi se hem i kam wan memba blong Jos, mo hem i bin wantem blong mit wetem ol misinari. Wantae nomo mi tingbaot eksperiens ia long strong trening blong militeri wetem man blong plen ia we

mi. Hem mo waef blong hem tu, oli kasem baptaes. Ol brata blong mi mo mi naoia, mifala i gat ol bigfala famli wetem ol bubu pikinini. Mifala evriwan i lavem Lod wetem Jos blong Hem.

Mi no bin save nem blong man blong plen ia we i no fraet. Mi neva luk hem bakegen, be bae mi talem tangkyu kasem taem we i no save finis from strong tingting blong hem blong stanap from wanem we hem i biliv long hem. ■

# Stap Wet long Promes

I kam long Juana Moreno de Ruiz, Sonora, Mexico

*Gel blong mi i bin go longwe long Jos, be mi save se bae hem i kasem blesing long ol samting we hem i bin lanem abaot gospel.*

**T**ri manis bifo hem i kasem 21 yia blong hem, mi bin kasem baptaes tugeta wetem sista blong mi, mama blong mi, mo nefiu blong mi we i gat eit yia. Ol yia i go mo mifala i hang strong long gospel nomata ol fulap jalenj blong mifala.

Taem hasban blong mi mo mi i mared, mitufala i bin tingting strong blong stap strong long Jos. Taem ol pikinini i kam, hasban blong mi mo mi i traehad blong stap olsem ol gudfala papa mo mama mo blong tijim gospel insaed long hom blong mifala.

Wan dei mi bin go long wan konfrens wetem gel blong mitufala we i gat wan yia. Long konfrens ia, wan Eria Seventi i bin tokbaot responsabiliti blong ol papa mo mama blong tijim gospel long ol pikinini blong olgeta.

Afta hem i bin mekem wan promes we i bin tajem mi bigwan. Hem i talem: "Sapos, afta evri samting we yu save mekem blong tijim gospel mo wan long ol pikinini blong yu i lego Jos, bae oli stil kasem blesing from ol samting we oli tingbaot we oli bin eksperiensem long hom."

Ol toktok blong Eria Seventi ia i bin fulumap mi wetem hop from mi gat ol nis mo nefiu we oli bin lego Jos. Plante yia afta, semmak pikinini blong wan yia ia we bin holem long ol han blong mi long taem blong konfrens



ia, i lego Jos taem hem i kasem 17 yia. Hem i bin faenem wan man we i no groap long gospel, mo tufala i bin mared. Hem i neva go long jos afta long hemia.

I bin soa bigwan long mi. Mi askem miwan bakegen mo bakegen, wanem mifala i bin mekem i no stret.

Oltaem papa blong hem mo mo i bin traem blong folem ol komammen mo givim seves insaed long Jos. Mifala i lavem ol pikinini blong mifala mo wantem wanem we i moa gud blong olgeta. Afta long fulap krae mo kwestin, mifala i agri nomo se ol pikinini oli gro, yusum fridom blong jusum, mo oli no stap bilivim ol samting we oli stap lanem long hom oltaem.

Sori tumas we, mared blong gel blong mi i brok, mo hem i no wantem kambak long Jos yet. Mi save tingbaot nomo promes ia se bae hem i tingbaot mo bae i kasem blesing from ol samting

we mifala i bin tijim long hem long hom.

Mi gohed blong prea from gel blong mi. Mi lavem hem wetem ful hat blong mi, mo i soa long mi blong luk hem longwe long Jos. Be mi save se, nomata ol samting we mi no stret long hem, ol samting we mi bin tijim hem oli stret mo tru. Mi save se Papa long Heven i stret mo gat lav mo Hem i stap lisin long ol prea blong yumi. Mi save long hat blong mi mo nogat tu tingting se, sapos mi mekem pat blong mi, bae Hem i ansarem olgeta long ol taem we Hem i luk i stret. ■

# "?Hu I Sperem Boe blong Mi?"

I kam long Sandra Beatty, Ontario, Canada

*Mi bin luk miwan we mi stap singaot long man ia we i sperem boe blong mi long trak, be afta, mi stap fes tu fes wetem draeva ia.*

**M**i jes dropem gel blong mi long haos blong wan fren taem hasban blong mi, Jonathan i ringim mi. Hem i talem long mi se, wan trak i bin sperem boe blong mitufala we i gat 11 yia, Aiden, taem hem i stap krosem rod.

Draeva i tanem long lef long fored blong Jonathan mo i no luk Aiden long baeskel blong hem. Draeva i sperem fored blong baeskel blong Aiden. Hem i flae antap we i stap hang long baeskel yet mo i bangem hed blong hem long saed blong trak taem i foldaon i kam daon. Hem i foldaon long rod wetem baeskel blong hem antap long hem. Laki nomo se hem i stap werem wan helmet. Draeva mo sam nara man oli stop blong help taem Jonathan i stap ringim wan ambulens.

Kwiktaem, maen mo ol filing blong mi i stat blong miks mo mi wari, kros mo konfius. Mi spid i go long ples we aksiden i bin tek ples long hem mo hop blong stap long taem wetem ambulens blong mekem se mi save stap wetem Aiden.

Ol tingting blong rao nogud long draeva oli stap resis tru long maen blong mi. "?Draeva i stap tingting long wanem?" Mi tingting long miwan. "?Oli drong? ?Oli stap lukluk fon blong olgeta?" Mi kros tumas mo wari bitim mak. Mi no save nating se Aiden i kil nogud olsem wanem.

Taem mi kasem ples blong aksiden, ambulens i bin aot finis. I gat

tu polis trak nomo mo wan trak i pak long saed blong rod long ples we aksiden i hapen long hem. Wan woman we i wari bigwan i stanap narasaed long trak ia.

Mi wokbaot i go long hem mo askem hem: "?Yu bin sperem boe blong mi?"

Kwaet nomo hem i talem: "Yes mi mekem."

Mi bin luk miwan we mi stap singaot long man ia we i no lukaot gud mo i sperem boe blong mi long trak, be afta, taem mi stap fes tu fes wetem draeva ia, evri nogud samting i lus. Mi faenem miwan i stap krae mo haggem hem. Hem i talem sori mo mi talem long hem se bae evri samting bae i oraet. Mi faenem afta se hemia ol stret semmak toktok we Aiden i bin talem long hem bifopolis i kam. Long en, Aiden i oraet wetem sam skras mo smosmol kil nomo.

Mi talem tangkyu tumas se long impoten taem ia, Papa blong yumi long Heven i bin blesem mi wetem paoa blong soem fogivnes be i no fasin blong no laekem, nomata we mi no bin askem Hem blong mekem. Mi save se Hem i stap wajem yumi mo oltaem Hem i stap givim help blong Hem long yumi. ■





## Alma 23–29

29 JUN–5 JULAE

**A**fta we oli jenism laef blong olgeta, Ol Man blong Leman we oli fetful oli bin wantem wan niu nem blong mekem oli luk defren long ol narafala Man blong Leman olsem wan saen we oli bin jenism laef blong olgeta i go long Kraes. Oli singaotem olgeta Ol Antae-Nifae-Lihae (luk long Alma 23:16–17). Yumi mekem yumiwan i luk defren long ol narawan tedei taem yu stap tekem nem blong Jisas Kraes long yumi.

### TOKTOK RAON

?Olsem wanem nao blong stap tekem nem blong Kraes long yuhan long ol tingting mo aksen blong yu blong evri dei blong i pusum yu moa blong kam olsem wan disaepol blong Hem we i moa gud?

# ?Olsem Wanem Wan Nem I Impoten?

**Saen  
blong  
Fasin blong  
Jenisim Laef  
blong Yumi**

Taem yumi baptaes, yumi mekem kavenan wetem God blong yumi tekem nem blong Kraes long yumi. Evri taem yumi tekem sakramen, yumi stap riniu kavenan ia. ?Wanem kavenan yumi mekem blong tingbaot mo mekem taem yumi tekem nem blong Hem long yumi? (Luk long Mosaea 18:8–9; Doktrin mo Ol Kavenan 20:77.)

**Wan  
Witnes  
blong Kraes**

Ol Aposol oli ol “spesel witnes long nem blong Kraes long ful wol” (Doktrin mo Ol Kavenan 107:23). Yumi save stap olsem ol witnes blong Kraes tu. ?Olsem wanem yu save stanap wetem profet mo ol aposol mo stap olsem wan witnes blong nem blong Kraes long ol pipol raon long yu?

**Wan  
Ples blong  
Kasem  
Paoa**

I no longtaem i pas, Presiden Nelson i bin askem strong long yumi blong singaotem Jos folet stret nem blong hem, we hem i: Jos Ia blong Jisas Kraes blong Ol Lata-dei Sent. Hem i bin promesem se bae paoa i kapsaet long ol Sent taem yumi stap yusum stret nem blong Jos (luk long “Stret Nem blong Jos,” *Liahona*, Novemba 2018, <https://www.churchofjesuschrist.org/study/liahona/2018/11/sunday-morning-session/the-correct-name-of-the-church?lang=bis>). ?Wanem sam samting we yu save mekem blong yusum stret Nem blong Jos moa mo helpem ol narawan blong mekem semmak?





Koriho i wan man we i no biliv long Kraes we i bin prij “agensem ol profesi we ol profet oli bin talemaot, long saed blong taem we Kraes bae i kam” (Alma 30:6). Hem i prijim ol nara giaman mo i lidim “ol hat blong plante i go longwe” (Alma 30:18).

Nomata hemia i bin hapen i bitim 2,000 yia i pas finis, plante pipol i prijim ol semmak samting. ?Wanem nao yumi save mekem blong mekem yumi stap strong agensem ol giaman tijing long taem blong yumi?

### TOKTOK RAON

?Hu i stap tijim ol giaman samting tedei? ?Wanem mesej nao oli stap sendem? ?Wanem nao God i bin givim long yumi blong stanap agensem ol giaman samting mo lanem trutok?

# ?Olsem Wanem Yumi Save Stanap Agensem Ol Giaman Tijing?

## ► Yumi Save Kasem Testemoni blong Yumiwan

Koriho i bin tijim ol pipol “se bae i no gat Kraes” mo “i no save gat wan atonmen i hapen,” mo hem i tanem baksaed blong hem long God se i no gat God (luk long Alma 30:12, 17, 28).

?Olsem wanem yumi save save se God mo Jisas Kraes i stap laef? ?Wanem ol skripja o eksperiens blong yuwan we i bin mekem testemoni blong yu abaot Olgeta i kam moa strong?

## ► Yumi Save Dipen long Revelesen

Koriho i bin tanem baksaed blong hem long spirit blong profesi mo revelesen. Hem i bin traem blong mekem ol pipol i biliv se “i no gat wan man we i save eni samting we bae i kam” mo “yufala i no save kasem save long ol samting we yufala i no luk” (Alma 30:13, 15).

Yumi save lukluk i go long ol profet mo aposol blong kasem toktok blong God long taem blong yumi. ?Olsem wanem nao blong stap folet profeti i protektem yu agensem ol giaman tijing?

## ► Yumi Save Tingbaot Se Trutok Hem I Trutok


Koriho i bin talem long pipol se i no gat wan wei we oli save wanem i tru (luk long Alma 30:24), be

Presiden Russell M. Nelson i bin tijim: “Sam samting oli simpol mo tru nomo. . . .

“. . . Trutok i stanap long ol loa we God i bin stanemap. . . .

Ol loa we i no save finis i wok insaed mo i gat paoa long laef blong yumi wan-

wan, nomata we yumi i biliv long hem o no” (“The Love and Laws of God” [Brigham Young University devotional, Sept. 17, 2019], speeches.byu.edu). ?Olsem wanem yumi save faenemaot ol trutok blong God, mo olsem wanem oli blesem laef blong yumi?






**A**fta we Alma i komperem tok blong God olsem wan sid (luk long Alma 32:28–43), ol pipol i askem hem olsem wanem oli planem sid ia. Alma i yusum stori blong Moses mo snek we oli wokem long bras long Ol Namba japta 21 olsem wan eksampol blong stap wok wetem fet (luk long Alma 33:19–23).

#### TOKTOK RAON

Ol Man blong Isrel oli nid blong lukluk nomo blong kasem hiling. ?Wanem nao sam long ol gospel prinsipol we i luk olsem i isi nomo olsem blong “stap lukluk”? ?Wanem ol fasin mo samting we i stap holem taet yumi blong stap laef folem ol simpol gospel prinsipol?

?Olsem wanem yu save lukluk i go long Sevya long ol samting we yu stap eksperiensem evri dei?

# ?From Wanem Alma I Serem Stori blong Moses mo Snek We Oli Wokem long Bras?



#### Wan Kaen blong Kraes

Wan kaen i wan samting we ripresentem o haed biaen long wan samting o man. Taem ol posen snek oli bin kakae Ol Man blong Isrel, Moses i bin leftemap snek blong hem we oli wokem long bras, we i bin kam olsem wan Kaen blong Kraes. Evriwan we i bin mekem mo wok folem fet i bin lukluk i long hem mo i hilim olgeta, semmak olsem evriwan we oli mekem mo wok folem fet blong olgeta long Jisas Kraes bae Hem i hilim olgeta long spirit.

#### Sam Oli Mekem Hat blong Olgeta I Strong

Nomata i simpol olsem we yumi save luk, sam pipol oli mekem hat blong olgeta i strong mo no akseptem, mo olsem wan risal we snek i kakae olgeta, oli ded. ?From wanem oli no lukluk? (Luk long Alma 33:20). ?Wanem hemia i save tijim yumi abaot fet mo fasin blong no biliv?

#### ?Bae Yu Save Kasem Hiling?

Sapos yu save kasem hiling from yu mekem wan simpol samting olsem blong lukluk nomo, ?bae yu no wantem mekem? Alma i putum kwestin ia stap mo invaetem yumi blong lukluk i go long Sevya taem yumi stap biliv long Hem (luk long Alma 33:21–22).



# ?Olsem Wanem Fasin blong Sakem Sin I Tanem Harem Nogud I Go long Glad?

**A**lma i bin serem eksperiens blong hem long olsem wanem hem i bin jenisim laef wetem boe blong Hileman. Alma i talem long hem olsem wanem hem i bin “filim i soa wetem trabol we i no save finis” from “ol sin mo ol rabis fasin [blong hem]” (Alma 36:12–13). ?Yu filim olsem wanem taem yu eksperiensem sem ia from sin?

## Bon long God

Afta long tri dei blong harem nogud long tingting mo sol, Alma gat wan tingting we i bin mekem harem nogud blong hem i go daon (luk long Alma 36:19). Hem i bin testifae se hem i “bin bon long God” (Alma 36:23). ?Wanem i bin lid i go long, hem we i bon long God? (luk long ves 18.)

## Glad afta long Bigfala Harem Nogud

Alma i bin eksperiensem bigfala harem nogud from ol sin blong hem, be taem hem i tingbaot mo singaot long Jisas Kraes, swit mo naesfala glad blong fogivnes i bin tekem ples blong harem nogud ia (luk long Alma 36:20).

**TOKTOK RAON**  
?Wanem nao yu save mekem blong gogohed blong tras long Lod mo tingbaot sakrifaeas blong Atonmen blong Hem?

?Olsem wanem yu save karem moa sol blong sakem sin mekem se olgeta tu, i save eksperiensem gudfala glad ia we i no save finis?



## Tras long God

Taem hem i stap tingbaot Atonmen blong Jisas Kraes, Alma i bin lanem blong tras long God mo i save se bae oli lefte-map hem long las las dei (luk long Alma 36:3). ?Olsem wanem nao blong stap tingbaot mo dipen long Atonmen blong Sevya i bin karem glad i kam long yu?



# Mi Stap Eksperiensem Fasin Ia blong Laekem Wan We I Semmak Seks long Mi—

## ?Bae Ol Memba blong Jos I Welkamem Bak Mi?

I kam long Bouke "Bob" S. Ecoma Verstege

*Not i kam long man we i raet: Mi serem stori blong mi olsem wan fasin blong soem tangkyu blong mi long ol Jos lida mo ol memba we oli bin welkamem bak mi wetem ol open han, helpem mi blong kambak fulwan, mo oli bin givim seves long saed blong mi olsem ol disaepol blong Kraes.*

**L**ong 27 Julae 2013, afta long wan longfala faet wetem sik blong stap fogetem samting, laef patna blong mi 25 yia i bin ded. Jay Elredge i wan dokta blong hat we ful wol i save long hem. Mitufala tugeta i bin go long ol misin blong Jos Ia blong Jisas Kraes Ia blong Ol Lata-dei Sent taem mitufala i bin moa yang be afta mitufala i go longwe long Jos from fasin ia blong laekem wan we i semmak seks.

Ded blong Jay, nomata we mi save bae i save hapen, i bin nogud tumas long mi. Mi filim hat blong i brok mo i lus mo mi stap miwan.

Taem mi stap draev i gobak long haos afta we mi mekem ol aren-jmen blong fenerol, mi bin filim paoa blong Tabu Spirit i kavremap mi strong tumas i mekem mi mas stop long saed long rod. Mi save se God i stap toktok long mi, singaotem mi blong gobak long Hem, be mi bin no wantem. "Yu no save luk se mi stap harem nogud?" Mi talemaot laod. "Mi no save fesem blong stap gobak long jos naoia."

Be moa mi stap pusumbak, Spirit i pulum mi moa, mo stap inva-tem mi blong gobak long jos.





### ?Bae Oli Akseptem Mi?

Mi wari bigwan blong gobak long jos. Mi no bin go long wan sakramen miting blong 25 yia. ?Bae oli akseptem mi yet? ?Bae mi akseptem olgeta? ?Bae bisop i talem wanem? Mi filim wari tumas mo tingting i no stap kwaet mo mi hevi wetem harem nogud yet.

Be testimoni blong mi long gospel i neva seksek truaot evri yia ia. Jay mo mi i lavem Jos mo ol prinsipol we oli lidim wok—speseli, jareti, sore, mo fogivnes. Mi save se Kraes i Sevya blong mi mo Jos blong Hem i Jos Ia blong Jisas Kraes blong Ol Lata-dei Sent. Mi bin save hemia stat long taem we mi bin jenisim laef mo baptaes blong mi taem mi gat 14 yia. Mi no rere blong tanem bak blong hemia naoia.

Long en, afta we mi hivimap evri strong tingting blong no fraet we i nid, mi ringim Linwood Wod long Niu Jesi, YSA, blong faenemaot wanem taem sakramen miting i stat long hem.

Taem Sandei i stap kam kolosap, enemi i putum fulap samting i blokem rod blong mi we bae i mekem i isi nomo long mi blong no go. O mi talem tangkyu tumas se Tabu Spirit i gohed blong pusum mi.

Mi bin filim fraet taem mi go insaed long biling, be opening hym blong sakramen miting i talem bakegen long mi wetem strong tingting se mi stap long hom bakegen. Hym ia “Kam Kam Ol Sent” (STSP, pej 2) i bin invaetem Spirit wetem fulap paoa i mekem ol wota blong ae blong mi i ron daon long fes blong mi. Mi save wantaem se Papa long Heven i save long mi mo bigfala harem nogud we mi stap filim.

Hym i bin kam olsem wan long ol antem blong Jos, be i bin kam olsem wan antem blong miwan tu.

“Kam,” hym ia i invaetem mi. “Nomata yu luk se rod hem i had, God i givim sapot.”

Rod blong mi *i bin* had. Be gladhat blong God *i bin* kam long mi olsem we Hem i bin promesem.

Bisop Darren Bird mo olgeta evriwan long kongregesen i bin gud tumas blong welkamem mi. Oli bin akseptem mi olsem brata blong olgeta long Kraes.



## OL MEMBA WE OLI PAT FULWAN

"Wan man we i stap folem ol kavenan mo ol standet mo tijing blong gospel blong Kraes—nomata we maet oli stap wok wetem fasin blong laekem wan we i semmak seks—i no gat wan risen we oli no save tekpat fulwan o stap olsem wan memba blong Jos we i pat fulwan mo holem ol koling mo toktok mo go long tempol mo givim seves long we. Mo evri nara janis mo blesing we i save kam tru long Jos membasisip bae i stap blong olgeta."

Elder D. Todd Christofferson blong Kworom blong Olgeta Twelef Apostol, "LGBT People Who Live God's Laws Can Fully Participate in the Church" (video), [ChurchofJesusChrist.org/topics/gay](https://ChurchofJesusChrist.org/topics/gay).

## Blong stretem mi wetem God, tru long Kraes.

Ol toktok ia blong "Kam Kam Ol Sent" i gat wan mining we i moa bigwan long mi, taem mi filim Papa long Heven i stap lidim mi long olsem wanem bae mi gohed.

*Bae yumi kasem ples we God Hem i bin givim long yumi.*

*Longwe longwe long Wes,*

*Long ples ia bae i no gat man i save kam blong spolem o mekem yumi fraet;*

*Long ples ia Ol Sent oli kasem blesing.*

Mi bin go long wes mo pem wan haos long Fountain Hills, Arizona, YSA, long ples ia we mi mitim Bisop Jerry Olson. Taem mi bin askem blong luk hem mo sekhan wetem hem, Spirit i talem long mi se man ia bae i help blong karembak mi fulwan i kambak long jos.

Taem mi stat blong stap go luk bisop mo statem fasin ia blong stretem miwan wetem Papa long Heven, mi bin witnessem fulap merikel long saed blong spirit. Mi fri blong serem samting wetem bisop, mo mi talem tangkyu tumas from hemia. Hem i talem se hemia i helpem hem blong andastanem moa weaples mi bin stat long hem mo weaples mi stat long hem naoia long rilesensip blong mi

wetem God. Mo tu, hem i talem long mi wetem lav se hemia i fas taem blong hem blong hem i save gat janis blong givhan long wan man we i stap laekem wan we i semmak seks, mo Hem i bin askem blong mi save gat fasin blong wet longtaem mo fogivnes sapos hem i talem o mekem eni samting we bae i mekem mi filim nogud truaot long rod blong kaonsel ia.

Mi talem tangkyu from onesti blong hem mo talem, "Be, hem i fas taem blong mi tu. Bae yumitu lan tugeta."

!Mo hemia i wan stat blong wan gudfala rod mo frensip!

I no longtaem, mi bin gat wan plan blong folem long olsem wanem blong kam olsem wan memba bakegen. Mi bin akseptem kaonsel we i fulap long lav mo prea wetem wan hat blong talem tangkyu mo mi statem kaonsel ia.

## Pis Insaed long Tempol

Afta, taem mi bin stap folem kaonsel mo wok had blong kam moa kolosap long Kraes, mi bin kasem restoresen blong prishud blong mi mo ol tempol blesing mo akseptem wan koling blong wok long kworom blong ol elda. Long tabu tempol, taem mi toktok wetem Papa long Heven, Hem i soem long mi hamas Hem i lavem evri pikinini blong Hem. Mi bin filim pis mo wan bigfala gladhat ia blong mekem Hem i hapi long mi.

Sam manis afta, oli singaotem wan niu bisop, we mi bin developem wan frensip wetem lav tu, wetem hem. Bisop Larry Radford i bin save situesen blong mi tu, mo i talem tangkyu from seves blong mi long kworom blong ol elda, we hem i talem se mi bin givim seves wetem lav mo fasin blong givim mi fulwan i go long kworom mo tu,—mo moa impoten—long God. Ol kaen toktok blong hem mo blong stap



leftemap tingting blong mi i bin helpem mi blong filim se Lod mo ol  
Sent we oli stap wetem mi oli glad long seves blong mi.

Naoia mi givim seves wetem fet olsem wod klak.

### **Blong Stap Andastanem Huia Mi.**

Blong gat fasin ia blong laekem wan we i semmak seks mo blong  
stap olsem wan aktiv memba blong Jos i no isi oltaem. Be taem mi  
putum evri fet mo tras blong mi long God, mi save filim Hem we i stap  
mekem mi kam moa strong. Ol man blong talem nogud man bae oli  
no tingting tu blong talem se mi stap stap tru long huia mi o se mi stap  
mekem komuniti blong olgeta we oli gat fasin ia blong stap laekem  
wan we i semmak seks, i no hapi.

Mi andastanem kros blong olgeta, mo yu luk gud nomo se mi nogat  
evri ansa. Mi save tokbaot eksperiens blong miwan nomo. Mo eksperiens  
ia i tijim mi hemia: Mi mi wan boe blong Papa long Heven, wan  
pikinini blong God. Mo hemia nao i wan nem ia nomo we i gat mining  
long mi. Olsem wan risal, mi traem blong no letem ol nem we wol i  
save givim blong eksplenem huia mi. Mi fraet se bae i stopem paoa  
blong mi long hamas mi save mekem mo fasin blong mi we i no save  
finis blong stap progres.

Setan i waes tumas. Hem i save se taem oli yusum ol nem, hem i  
save seraotem yumi olsem wan komuniti mo olsem wan jos.

Wetem lukluk mo tingting ia long maen, ol joes we mi mekem i no  
from fasin blong mi laekem wan we i semmak seks, be, long olsem  
wanem blong save stap olsem wan tru disaepol blong Kraes *wetem*  
fasin ia blong laekem wan we i semmak seks. Olsem Nifae i bin talem:

"O Lod, mi bin trastem yu, mo bae mi trastem yu blong oltaem. Bae  
mi no putum tras blong mi long han blong bodi blong mit mo bun. . . .

" . . . Mi save se God bae i glad blong givim eni samting long man  
we i askem samting. Yes, God blong mi bae i givim long mi, sapos  
mi no askem eni samting we i rong; from hemia, bae mi singaot laod  
long yu; yes, bae mi singaot long yu, God blong mi, strong ston blong  
stret mo gud fasin blong mi. Luk, voes blong mi bae i go antap long  
yu blong oltaem, ston blong mi mo God blong mi we i no gat en"  
(2 Nifae 4:34–35).

### **Lav blong Oi Sent We Oli Stap Wetem Mi**


Truaot long taem blong mi we mi kambak, mi bin filim kompanion-  
sip we i fulap long lav blong ol lida mo sent we oli stap wetem mi. Mi  
faenem wan ples we mi save traehad long hem. Mi bin faenem long  
medel blong ol fasin blong Kraes, oltaem mi putum tugeta wetem  
fet blong mi: sore, lav mo sore blong God, fasin blong andastan, mo,  
antap long evriwan, lav.

Taem mi stap traehad folem rod wetem Sevya blong mi, mi bin filim  
kamfot mo pis taem mi tanem mi i go long Hem, mo save se mi no stap  
wokbaot long rod ia miwan. Sam bisop oli bin stap long saed blong mi.

Ol memba blong kworom blong mi. Ol sista  
insaied long wod. Mi iven gat wan yang man  
long wod we i askem mi sapos mi save ode-  
nem olsem wan pris. Kaen invitesen ia i bin  
tajem mi bigwan. Hem i bin luk mi olsem wan  
man we i holem prishud blong God we i save  
eksasaesem prishud insaied long seves we i  
givim long ol nara wan.

Ol janis ia blong givim seves mo wosip  
wetem ol Sent we oli stap wetem mi i bin  
leftemap tingting blong mi—tugeta wetem ol  
plante blesing we mi bin kasem long Lod—i  
helpem mi blong eksperiensem lav, fasin  
blong andastan, mo fasin blong akseptem  
olsem we mi bin nidim.

Sevya i talem: "Mi no save lego yufala i stap  
nomo olsem. Bambae mi mi save kambak  
bakegen long yufala." (Jon 14:18). Ol toktok  
ia oli tru. Mi bin nidim kamfot, mo Hem i kam  
long mi, fulap moa bitim we mi save tingting  
long hem. ■



### **HAOS BLONG GOSPEL**

"Haos blong gospel i bigwan inaf blong  
evri wan wetem wan gladhat blong folem  
Lod. Taem wan man i talem o filim se  
hemia i no tru, mi tingting long Bob Verstege  
mo wantem tumas blong oli mitim  
hem mo givim seves wetem hem. Brata  
Bob Verstege i wan eksampol we i stap laef  
long wanem Atonmen blong Jisas Kraes i  
save mekem taem yumi putum i go long  
aksen. Olsem wan bisop, mi bin filim spirit  
blong mi i kam antap, lanem wan samting,  
mo kam antap long tingting from man ia  
we i gat tingting we i daon evri dei."

**Bisop Larry Radford, Fountain Hills Ward,  
Scottsdale Arizona Not Stek**

# Ol Yang Adalt

## Insaed long Seksen Ia

- 46 ?From Wanem Papa long  
Heven I Wantem Mi blong  
Kasem Wan Edukesen?  
I kam long Gloria Cornelio
- 50 Wan Samting Abaot Fiuja  
We Mi Save Kontrolem  
I kam long Laura Campaner

## Dijitol Nomo

- I Tekem Wanem blong Kasem Ol  
Stret Mo Gud Tingting blong Hat  
blong Yumi  
I kam long Marc Deo Dela Cruz
- Olsem Wanem, From Wanem,  
mo Wea blong Stap Sevem  
Mane
- 5 Samting We I Sua long Wan  
Wol We I No Sua  
I kam long Meg Yost

Faenem olgeta atikol ia mo sam moa:  
• Long [Liahona.ChurchofJesusChrist.org](http://Liahona.ChurchofJesusChrist.org)  
• Insaed long YA long Wik (andanit long Ol  
Yang Adalt sekseen insaed long Gospel Laebri)

## Stap Fesem Fiuja We Yu No Sua long Hem Wetem Fet

**M**i mi wan man blong mekem plan Mi laekem blong save wanem bae i kamaot long evri dei, mekem se mi save rere from. Be **?olsem wanem bae mi rere blong fiuja** taem we i stap longwe mo mi no sua long wanem bae i happen long hem?

Laef i, bigwan tumas !! gat fulap samting long fored blong hem! !! gat fulap samting we bae i save happen! I gat fulap samting we mi save mekem! **Samtaem ol janis i tumas.**

I gat fulap samting we mi wantem: wan hasban o waef, wan gudfala wok, blong laef ovasi, blong gat wan puskat, blong raetem wan buk, blong lanem lanwis blong Russia . . . Be mi save tu se, ol samting we hat i wantem mo ol ol oli stap jenis. Ol samting we i moa impoten i stap jenis.

Wan samting we i impoten we i no mas muv hem i **komitmen blong yumi long God mo plan blong Hem**. Wetem lukluk blong Hem we i stap lukluk long fored, **yumi save faenem rod tru long fiuja** we i fulap long ol kwestin from bae Hem i helpem yumi blong faenem ol ansa, wan step afta wan. Yumi nid nomo blong mekem ol bes joes we yumi save mekem wetem wanwan step.

Long sekseen ia, ol yang adalt oli serem ol eksperiens blong olgeta wan abaot olsem wanem oli plan from fiuja wetem help blong Papa long Heven mo **olsem wanem oli muv fored wetem fet** taem oli fesem fulap samting we oli no sua long hem.

Taem i kam long fiuja, i gat fulap kwestin, be i minim se **i gat fulap paoa blong save mekem samting**. Yumi tu, yumi gat paoa—tabu paoa blong save kam olsem Papa long Heven mo boe blong, Jisas Kraes.

Mo hemia i mekem fiuja blong yumi i gat glori.

Meg Yost

## Serem Stori blong Yu

?Yu yu gat wan eksperiens blong serem? ?O yu wantem luk sam atikol abaot sam spesel topik? !Sapos i olsem, mifala i wantem harem yufala! Sendem ol atikol blong yufala, o fidbak blong yufala long [Liahona.ChurchofJesusChrist.org](http://Liahona.ChurchofJesusChrist.org).



# From Wanem Papa long Heven I Wantem Mi blong Kasem Wan Edukesen

I kam long Gloria Cornelio

Nomata wanem  
ol samting we  
hat blong yumi  
i wantem we i  
stret mo gud,  
Papa long Heven  
bae i givim wan  
wei long yu  
blong yu kasem  
olgeta.

**S**tat long taem we mi smol, oltaem mi bin wantem blong mekem Papa blong mi long Heven mo famli blong mi blong naoia mo long fiuja i glad long mi. Mi bin wantem blong kasem evri edukesen we mi save kasem blong mekem miwan mo laef blong mi i kam moa gud.

Long kantri blong mi, Peru, kwaliti edukesen i sas tumas mo, long sam eria, yu no save kasem nating. Famli blong mi i no bin gat evri risos blong sapotem edukesen blong mi tu. Be papa mo mama blong mi i bin tijim mi se blong stap wok had, stap strong, mo stap askem Papa long Heven from help i save mekem ol samting we hat blong yumi i wantem we oli stret mo gud i kam tru. Mo mi bin plan blong wok had.

Long praemeri mo hae skul, mi bin strong long ol stadi blong mi blong save mekem miwan i kam antap moa evri yia. Afta long hae skul, oli akseptem mi long bes yunivesiti blong Peru mo mi bin kasem wan gud skolasip. Taem mi stap long we, mi bin wok wetem sam oganaesesen, mo tu, wan trening wetem wan wol oganaesesen, mo gat janis blong lidim fulap kaenkaen projek.

Long taem blong trening ia, mi bin filim se bae i wan bigfala mo gudfala janis blong mi blong kasem wan edukesen long Inglis. Mekem se mi disaed blong go long Brigham Yang Yunivesiti—Aedaho. Mi filim i bin had, be mi save se Papa long Heven bae i helpem mi blong winim gol ia—mi jes nidim blong trastem Hem mo mekem pat blong mi.





Mi fas intanasonal  
studen blong  
kasem wan  
digri tru long  
BYY Pathway  
Worldwide.

### **Wan Jenis long Ol Plan**

Oli bin sendem mi i go long BYY—Aedaho, be long taem blong stap mekem aplikesen, mi filim wan strong tingting mo filing se mi mas go long wan misin bifo mi go long we. Mekem se mi bin folem wil blong Papa long Heven mo oli singaotem mi blong wok long Trujilo, Peru. Taem mi gobak hom, mi plan blong gobak long yunivesiti long Peru from mi filim se mi save kasem wan digri long-we hariap. Be, mi faenemaot se oli no bin akseptem ol skolasip blong mi from mi bin lego ol stadi blong mi i bitim wan yia blong go long misin blong mi.

Mi bin harem nogud tumas mo mi lus. Mi no bin save wanem blong mekem. Mi no save mi bin kasem strong tingting blong go long wan misin sapos hem i minim se bae mi lusum janis blong mi blong kasem wan yunivesiti digri.

Be wan dei, mi tingbaot we misin presiden blong mifala i stap talem long mifala abao BYY-Pathway Worldwide. Hem i bin invaetem mifala blong mekem Inglis blong mifala i kam antap moa mo blong gohed long janis ia taem mifala i kambak long haos—!mo mi mekem!

### **Wokbaot blong Mi wetem BYY-Pathway Worldwide**

Mi save se blong misin presiden blong mi i tokbaot BYY-Pathway i no jes hapen nomo olsem. Taem mi statem Pathway program, i bin nidim mi blong travel kolosap tri aoa evri wik blong mit wetem grup blong mi. Mi sakrifaes fulap, be mi save se blong kasem wan edukesen i impoten tugeta long mi mo long Lod. Mo ol sakrifaes ia i lid i go long plante blesing.

BYU-Pathway Worldwide hem i bin windo blong janis ia we mi stap lukaotem. Hem i givim akses long mi long edukesen long wan praes we mi save pem, i mekem mi save gat inaf taem blong holem wan wok, mo i helpem mi blong gat wan edukesen long Inglis. Mo tru long evri samting, mi bin faenem ol gudfala fren we oli leftemap tingting blong mi blong no fraet mo gohed blong wok from ol gol blong mi. Mi filim mi moa strong long saed blong spirit mo mi kam wan disaepol blong Jisas Kraes we i moa gud.

Long en, mi fas studen blong wan defren kantri blong kasem wan bajela digri tru long BYU-Pathway Worldwide. Edukesen i bin openem fulap naesfala janis blong mi. Naoia mi wan welfea mo speselis blong stap dipen long yuwan blong Saot Amerika Not-wes Eria blong Jos, mo tu, mi wan volontia misinari blong BYU-Pathway long Peru. Mi luk fulap laet long wanwan pikinini, mo mi stap leftemap tingting blong olgeta blong muv i go fored semmak

olsem we ol fren blong oli bin mekem long mi long taem blong skul. Long wokbaot ia, mi kam blong luksave se Papa long Heven i bin stap wetem mi long evri step blong rod ia.

### **Papa long Heven I Wantem Yumi blong Win**

Wokbaot blong mi i bin mekem testimoni blong mi abao edukesen i kam moa strong. Mo mi plan blong gohed yet blong stap gro mo lanem fulap moa we mi save lanem evri dei. Yumi stap long wol ia blong progres, blong oli testem yumi, blong gro, blong pruvum fasin blong stap obej blong yumi, mo blong dipen long Sevya blong save kam klin inaf blong gobak stap wetem Papa blong yumi long Heven. Long God, “evri samting oli long saed blong spirit”—we insaedi gat edukesen tu (luk long Doktrin mo Ol Kavenan 29:34). Evri eksperiens we yumi gat mo save we yumi kasem long wol bae i helpem yumi blong kam moa olsem Sevya blong yumi mo bae i rere long yumi blong mekem ol desisen we oli moa gud, blong save givim seves moa gud long wol, mo blong stap olsem ol tul we oli moa gud long ol han blong Hem.

Edukesen i givim wan rod blong kasem save mo afta mekem folem, blong stanap from trutok mo raet, mo blong laef long wan laef we Papa long Heven i wantem blong yumi—wan laef we i fulap long glad.

Mi save se Papa long Heven i stap blesem yumi long ol efot blong yumi, speseli taem ol samting we hat blong yumi i wantem i blong progres mo blong givim seves long Hem mo ol pikinini blong Hem. Mi save se taem Hem i givim daereksem long ol pikinini blong Hem, “hem i mekem rere wan rod blong olgeta, blong oli save mekem samting ia we hem i talem long olgeta” (1 Nifae 3:7). !Hem i wantem yumi blong win!

Wanwan long yumi i mas mekem gud yus long wanwan janis blong edukesen mo gro we Lod i putum long rod blong yumi, nomata we i tru long BYU-Pathway o eni nara janis blong edukesen. Hem i lavem yumi mo oltaem i stap gaedem yumi. Hem i wantem yumi blong lanem evri samting we yumi save lanem long wol ia. Mo mi save se yumi eksperiensem ol bigfala mo gudfala merikel taem yumi stap wok strong wetem glad mo trastem gaed blong Hem. Mi save se mi mekem. ■



**Gloria Cornelio** hem i blong Lima, Peru. Hem i laekem tumas blong mekem samting we i no posibol i kam posibol, stap givim seves long ol narawan mo mekem ol laef oli kam moa antap, stap tij, mo oltaem stap lanem fulap olsem we hem i save mekem, speseli abaot ol nara kalja.

Blong faenemaot moa abaot BYU-Pathway Worldwide, go long [byupathway.org](http://byupathway.org).



### **EDUKESEN BLONG WAN FIUJA WE I MOA GUD**

*Ol yang adalt oli serem olsem wanem blong kasem wan edukesen i bin ki ia blong filim moa hop abaot fiuja:*

“Mi bon mo groap long Honduras—wan kantri we i fulap long ol janis be wetem wan stael blong laef we i had. Taem mi stap groap, mi stap lisin long ol stori abaot olsem wanem ol bubu blong mi we oltaem oli stap lukaotem ol janis blong help blong mekem nekis jeneresen i kam moa gud.

“Tangkyu long ol sakrifaes blong papa mo mama blong mi we brata blong mi mo mi i bin kasem bes edukesen we mifala i save kasem. Mi kam blong lanem se edukesen i no stop nomo long wan kolej digri. Edukesen i joen i go long heven.

“Sapos yumi rere, bae yumi no fraet. Edukesen i wan komanmen we i kam long Papa long Heven, mo Hem i givim yumi promes ia se folem hamas we yumi i obej ol komanmen blong Hem bae yumi kam antap gud long graon ia (luk long 2 Nifae 1:20). Edukesen i helpem mi blong krietem, gro, mo rere blong stap olsem joen ia we i moa strong blong ol jeneresen blong mi, mo i letem mi blong helpem ol narawan blong mekem semmak.”

—**Sara M. Barlow, Tegucigalpa, Honduras**

“Edukesen i bin helpem mi blong luk save mo faenemaot rol mo ples blong mi long famli blong man, mo hemia i mekem i glad tumas.”

—**Kerianta Kurene, Canterbury, Niu Silan**

“Edukesen i mekem mi filim se wetem fiuja wok blong mi, mi save stap olsem wan laet long wol ia mo prijjim gospel.”

—**Claudio Acuña Thomas, Antofagasta, Jael**

# Wan Samting abaot Fiuja we Mi Save Kontrolem

I kam long Laura Campaner

I stap kam moa had blong no lisin long smol voes ia insaed long hed blong mi. Mi stap ia we mi gat 28 yia, mi singgel yet mo no sua tumas long wanem mi wantem blong mekem olsem wan wok, nomata we mi bin gat wan gudfala wok eksperiens olsem wan midwaef we i stap lukaotem wan mama we i stap bonem bebi. Mi filim olsem evri lukluk blong mi long laef blong mi i no stap wok gud. Mi stap gat tu tingting long ol joes blong laef mo mi no save wij rod blong tekem Mi filim se mi jes lus nomo.

Long wan dei we mi no filim gud tumas abaot miwan, wan fren we mi no bin toktok wetem hem blong longtaem i ringim mi. Taem hem i askem sapos mi oraet, mi eksplenem evri filing blong mi we mi stap traehad wetem. Hem i bin lisin mo afta i talem, "Okei, ?be yu oraet long saed blong spirit?"

"O yes, hemia i stret evriwan," mi ansa kwiktaem nomo. "Mi neva filim kolosap long God olsem long laef blong mi."

Afta hem i ansa, "Be yu nomo nid blong wari abaot eni nara samting bakegen."

## Gat Tras long Plan blong God We I Stret Evriwan

Stat long taem we mitufala i stori, mi kam blong luksave tu samting. Faswan, mi luksave se mi talem tangkyu tumas blong gat wan strong tesemoni long gospel we i kambak mo blong save laef folem ol komanmen mo filim se mi joen wetem heven.

Blong stap dipen miwan long saed blong spirit i impoten tumas long mi, mo mi stap lanem yet olsem wanem blong openem ol heven long laef blong mi. Blong stap prea mo stadi long ol skripja evri moning oli tu simpol samting we mi filim se i mekem bigfala samting i defren long paoa blong mi blong kasem revelesen blong miwan. Mi filim tu, se mi joen moa wetem heven taem mi mekem wan efot blong stap kaen, blong gat wan helti laef mekem se Spirit oltuem i save stap olsem kompanion blong mi, blong stap obei long ol komanmen, mo blong sakem sin wetem wan tru hat mo tingting.



Nambatu, mi luksave se ansa blong mi long kwestin blong fren blong mi i no stret evriwan—mi bin ting se mi oraet “evriwan” long saed blong spirit, be mi nidim blong gat moa fet, blong stop wari tumas, mo tras tem God blong lukaot long ol samting we mi no save kontrolem.

Iven taem i gat sam lukluk long laef blong mi we i so stap go gud tumas olsem we mi wantem, mi save se impoten samting i blong mekem samting wetem fet mo soem long God se mi yusum paoa blong jusum blong mi blong mekem ol gud joes. Mi lanem se taem laef i no go gud long wei we mi ting se bae i go olsem, i olsem blong mekem se mi save lan mo gro long ol wei we mi no save mekem sapos i no bin olsem.

Mi neva pikjarem long maen blong mi se long namba 29 yia blong mi, bae mi faenem miwan i stap gat tu tingting abaot wok blong mi long fiuja mo nekis level blong laef blong mi. Be yet, nomata long ol samting ia we yumi no save, mi save gat ful tras long God se Hem i gat wan plan we i stret evriwan blong mi. Hem i save stret wanem i stap hapan mo wanem mi nidim, mo oltaem bae Hem i lukaot long mi (luk long Matiu 6:28–34). Semmak nomo olsem we Elda L. Todd Budge blong OL Seventi i bin tijim: “Olsem we i had blong andastanem, speseli long ol taem long laef blong yumi taem ol win we oli blo i kam long fored oli strong mo ol si oli muvmuv, yumi save kasem kamfot long save ia

we God long gudfala fasin blong Hem we i no gat en i stap oltaem blong pusum yumi i gohom” (“Wan Tras we I Semmak Oltaem mo I Wantem Gohed,” *Liahona*, Novemba 2019, <https://www.churchofjesuschrist.org/study/liahona/2019/11/27budge?lang=bis>).

## Trastem Moa; No Wari Tumas

Sam dei mi filim laef i had we, be taem mi tingbaot gud, mi save se mi no nid blong wari. Smol afta smol, mi kam blong luksave se mi nidim blong trastem God smol moa mo no wari tumas abaot ol samting we mi no save kontrolem. Wan samting ia we mi save kontrolem abaot fiuja hem i blong stap trastem God mo wok mo gro moa kolosap long Hem evri dei.

Taem mi filim se mi lus, oltaem i gat inaf laet blong mi blong tekem wan step i go insaed long ples ia we mi no sua long hem mo muv i go fored. Sapos mi gohed blong eksasaesem fet mo kipim ol kavenan blong mi, sapos mi gohed blong tingbaot tru aedentiti blong mi olsem wan gel blong Papa mo Mama long Heven mo traem bakegen mo bakegen, ol samting bae oli hapan taem mo olsem we oli sapos blong hapan, mo hemia i evri samting we i mata. ■



*Laura Campaner i bin groap long saot blong Franis long wan Spanis famli. Hem i wok olsem wan midwaef mo oltaem i stap lukaotem ol niu samting blong traem. Hem i wan man i laekem blong wok wetem ol pipol mo i intres mo laekem fulap ol defdefren kaen kalja.*

*“Long ol taem long laef blong yumi taem ol win we oli blo i kam long fored oli strong, . . . yumi save kasem kamfot long save ia we God long gudfala fasin blong Hem we i no gat en i stap oltaem blong pusum yumi i gohom.”*

—Elda L. Todd Budge blong OL Seventi



## Mi laekem tumas blong kuk bitim evri nara samting.

Mi bekem ol kap kek, smosmol kuki, mit mo ol kaekae wetem raes—!eni samting nomo! Mi laekem tu, blong tijim ol klas. Mi laekem tumas taem oli invaetem mi blong tijim wan Yang Woman klas.

Mi bin kam long konfrens Blong Ol Yut I Kam Strong from mi bin gat wan kwestin we mi wantem blong oli ansarem. Mi gat wan skolasip blong go long Yunivesiti, be mi filim se mi mas go long wan misin. Sapos mi go, bae mi lusum skolasip blong mi. Be sapos mi stap mo kam wan tija, mi save wok mo pem skul blong mi long semmak taem. Long taem blong YKS (Blong Ol Yut I Kam Strong) konfrens, wan sista i bin tokbaot petriakel blesing blong hem. Mi stap rere blong kasem petriakel blesing blong mi naoia, mo mi hop se taem bae mi kasem, bae mi save moa gud wanem we Papa long Heven i bin planem blong mi. Mi laekem tumas ol program blong yut mo YKS from i mekem ol yut i kam moa strong. From trutok i we, yumi evriwan i nidim pis.

Blong wan smol taem afta we mi bin baptaes, mi bin stop blong stap go long jos, afta gobak blong smol taem, afta stop bakegen. Be ol memba blong wod oli bin visitim mi mo invaetem mi blong kambak. Oli talem long mi se Jos mo ol memba i misim mi mo nidim mi. Mi disaed blong kambak, mo mi bin stap aktiv long stat long taem ia i kam. Mi luksave hamas mi nidim Jos. Mi save prea long Papa long Heven mo filim gud, mo mi save filim Spirit. !Mo i mekem se mi stap ia!

**Adriana T.** (long en long lef saed), 17 yia,  
Dominican Republic

## INSAED LONG SEKSEN IA



54

### Niufala, Olfala Famli blong Mi

I kam long Leonardo Conceição

### 56 Stap Jusum Rod la We I Stret Mo No Isi Bitim Isi Rod

I Kam long Elda Takashi Wada

### 60 Lesen blong Haos Naet We I Yusum Samting: Stap Yusum Gud Taem blong Yu

I kam long Natasha Andersen

### 62 Spes blong Yumi

### 64 Las Toktok: Testemoni mo Fasin blong Jenisim Laef

I Kam long Elda David A. Bednar

### 65 Ol Pipol we oli kam long Buk blong Momon: Amulek mo Alma

# Niufala, Olfala Famli blong Mi

Sapos yu letem, i nogat wan samting we gospel i no save jenism.

## I kam long Leonardo Conceição

Oli misinari oli holem wan foto i go antap. "¿Wanem nao yu luk?" oli bin askem,  
"Wan hapi famli," mi ansa.  
"?Evri famli oli hapi?"

Mi saksakem hed blong mi se no. "Yu bin luk *famli* blong mi," mi eksplenem.

Mi bin gat 16 yia mo stap laef long Brasil, ples we mi laef long hem ful laef blong mi. Ol misinari oli bin stap tijim mi blong sam wik, be i no gat wan nara man long famli blong mi we i wantem blong lisin. Long taem ia, ol misinari oltaem oli luk famli blong mi stap faet mo raorao. Famli blong mi mo famli ia we i stap smael long foto ia i no gat wan samting we semmak.

Wan long ol elda i talem, "Maet, ating famli blong yu naoia i no olsem. Be yu save bildim fiuja famli blong yu i defren long hemia."

Taem mifala i klosem visit, oli askem mi bakegen blong prea abaot wanem mifala i bin stap stadi long hem. Olsem oltaem, mi no promesem olgeta stret blong mekem. Mi laekem tumas olsem wanem mi bin filim taem ol misinari i visit, mo gospel i gat mining

long mi. Be mi fraet long ansa we bae mi kasem. Sapos gospel i tru, bae mi nidim blong mekem fulap jenis.

## Wan Niu Joes

Afta we ol elda oli bin go, mi no save stop blong tingbaot ol hapi famli. Famli blong mi i no iven kolosap long wan hapi famli. Papa blong mi i no pat blong laef blong mi. Rilesensip blong mi wetem mama blong mi i no gud tumas. Bubu woman nao i lukaot long mifala, be i no gat wan long mifala i mekem samting olsem famli ia we ol misinari i bin tijim abaot olgeta. No gat wan long mifala i soem lav long mifala wanwan o iven spendem taem tugeta.

Ful laef blong mi, mi promesem miwan se bae mi wan gud papa sam dei. Bae mi papa mo mama ia we mi neva gat. Be yet, taem ol misinari i tijim mi, mi stat blong luksave se mi stap mekem ol semmak samting we papa mo mama blong mi i stap mekem long ol yia olsem mi. Mi stap stat let aotsaed, mekem wanem mi wantem mekem, mo laef olsem wan man blong mekem trabol. Mi stap ripitim semmak stori we i no gat mining.

I taem mi askem God.

Long en, taem mi bin prea, mi kasem wan ansa we mi stap tingting long hem fultaem i kam. !Jos ia i tru! Naoia i taem blong mekem wan joes.



Gospel i soem long yumi  
olsem wanem blong mekem  
ol famli blong yumi i kam  
moa gud, nomata situesen  
blong famli blong yumi i  
olsem wanem.



## Wan Niu Mi

Bubu woman blong mi i mas givim raet long mi bifo mi save baptaes. Hem i i bin agensem be mi fos.

"Bubu woman, ?wij Leonardo nao yu wantem?" Mi askem. "?Hemia we i stap aotsaed i stap drink mo smok mo kambak long haos let? O yu laekem huia mi naoia? Ol jenis ia oli from gospel ia."

Long en, bubu woman blong mi i agri, mo mi bin kasem baptaes mo kasem konfemesen. Stat long taem ia, wan intresting samting i stat blong hapen long famli blong mi—wan samting we mi no luksave fulwan kasem sam yia afta.

## Wan Niu Famli

Stret long taem bifo mi aot blong go long misin long saot blong Brasil, bubu woman i bin kam long stek konfrens wetem mi. Afta long hemia, mifala i mekem wan smol testemoni miting wetem ol famli mo ol fren. Long sapraes blong mi, bubu woman blong mi i wantem taem wan samting.

"Stat long taem we Leonardo i bin joenem jos blong yufala, famli blong mi i stat blong kam wan *tru famli*," hem i talem. Afta, hem i talem ol wei we ful famli blong mifala i bin kam moa kolosap: Naoia mifala i spendem moa taem tugeta. Mifala i stat blong talem "mi lavem yu" long wanwan long mifala, we mifala i neva mekem olsem bifo. Ol faet mo raorao i stop. Ol tru frensip i stat blong develop long medel blong mifala evriwan. Mifala i gat moa blong kakae mo kasem fulap blesing long ol nara eria.

Mi bin luksave ol jenis ia tu, be mi no luksave se taem blong hem i bin stat long taem we mi bin kasem baptaes.

"Maet mi no wan memba blong jos blong yufala," hem i talem, "be mi wan fren blong jos blong yufala. Mo mi save se famli blong mifala i bin kasem blesing from joes blong Leonardo."

## Wan Niu Andastaning

!I had blong mi bilivim! Mo yet, taem bubu woman i stap toktok abaot olsem

wanem famli blong mifala i gro kam moa kolosap, kwiktaem mi tingbaot foto ia we ol misinari oli bin soem long mi plante yia bifo. Long taem ia bifo, mi bin ting se wei ia nomo blong gat wan hapi famli hem i wetem fiuja famli blong mi.

Be mi bin rong. !Famli blong mi naoia i hapi! Mifala i kam blong lavem mifala wanwan.

Ating bae i no gat wan long ol memba blong famli blong mi bae i joenem Jos long laef ia. Be iven sapos oli no ol memba, mi save se God i blesem mifala finis long fulap wei. Gospel blong Jisas Kraes i soem long yumi olsem wanem blong mekem ol famli blong yumi i kam moa gud, nomata wanem situesen blong famli blong yumi i olsem wanem. ■

*Hem we i raetem hemia i stap long Yuta, YSA.*

Stap Jusum

# Rod Ia We I Street Mo No Isi Bitim Isi Rod



*I bin gat tu rod long fored blong mi, mo mi save se i  
gat wan wei ia nomo blong save wijwan blong tekem.*




I Kam long Elda  
Takashi Wada  
Blong Olgeta Seventi

**M**i bin groap long Nagano, Japan, wetem papa mo mama blong mi. Relijin i wan pat blong evri samting we famli blong mi i mekem. Papa blong mi i nildaon long fored blong olta blong Budis evri moning mo naet. Mi no bin tingting long Budis olsem wan relijin—hem i wan wei blong laef. Bae hem i isi long mi blong gohed stap wan Budis blong ful laef blong mi, be God i bin pruvum long mi fulap taem se isi o popula wei, oltaem i no bes wei.

### ?Teks Buk o Tabu Buk?

Olsem wan yangfala boe, mi fesem hadtaem fulap wetem aedentiti blong mi. Mi stap tingting long miwan from wanem mi stap long wol ia mo huia mi mas kam olsem. Taem mi gat samples long 13 yia, prinsipol blong skul blong mi i givim long evri studen wan kopi blong Niu Testeman long Inglis mo lanwis Japan we i stap saed saed long tufala. "Hem i no blong ol stamba tingting blong relijin," hem i talem. "Hem i wan translesen we i gud tumas, so yusum blong stadi Inglis." Be taem mi openem, hem i givim ol skripja blong taem we yu filim se yuwan, nidim ol ansa long ol kwestin blong yu, o stap fesem hadtaem. !Mi save andastanem ol situesen ia!

Mi bin ridim abaot Jisas Kraes. "Yufala evriwan we yufala i stap hadwok tumas, mo we yufala i stap karem ol hevi samting, yufala i kam long mi, nao mi bambae mi tekemaot ol hevi samting ya, mi mekem we yufala i spel gud." (Matiu 11:28). "Karem kros [blong hem], [mo] biaen long mi" (Matiu 16:24). Ol toktok ia i gohed blong saon long mi nomata we mi no bin andastanem olgeta fulwan. Mi tingting long miwan huia Jisas Kraes mo i minim wanem blong gat Hem olsem wan Sevya. Mi tingting long miwan sapos i miwan nomo we i stap filim koneksen ia long wanem we i sapos blong stap olsem wan teks buk.




### ?Ronwe o Stap mo Lisin?

Sam yia afta, mi bin mitim sam misinari blong fas taem. Papa mo mama blong mi i bin wonem mi abaot ol yang Kristin we oli stap go raon mo prij. Taem mi stap wokbaot i gobak long haos, wan tol Ameriken misinari i stopem mi wetem wan kaen smael. Mi no save stret wanem blong mekem. Mi fraet se bae hem i tokbaot jos blong hem. Sapos hem i bin mekem, !maet bae mi ronwe long nara rod! Hem i askem nomo olsem wanem blong faenem post ofis. Mi bin talem long hem mo afta wokbaot i gobak long haos.

Taem mi stap wokbaot i go, mi filim wan samting. Sapos mi luk ol misinari bakegen, mi tingting long miwan, bae mi toktok wetem olgeta.

I no longtaem afta long hemia, mi fas long sam nara misinari. Mi bin sek se God bae i harem mo ansa long ol prea blong wan boe olsem mi, kasem taem mi bin ridim abaot Josef Smit. Mi bin ridim long Niu Testeman blong prea oltaem, ?be God blong i kamaot long wan man? Mi filim hat se hem i tugeta posibol mo stret. Mi no bin ronwe be mi putum wan apoemen blong oli kam tijim mi.





### ?Mekem Ol Eskius o Faenemaot Trutok?

Afta wan manis we mi stap luk ol misinari, oli bin invaetem mi blong kasem baptaes. Mi no bin wantem blong mekem olgeta i no glad, be mi tingting tu blong lego kastom blong papa mo mama blong mi mo evriwan raon long mi. I gat tu rod long fored blong mi, mo mi save se i gat wan wei mo wei ia nomo blong save wij wan blong tekem—mi mas prea olsem Josef Smit. Mi bin askem long Papa long Heven long nem blong Jisas Kraes, sapos ol samting we ol misinari i bin stap tijim long mi oli tru.

Ples ia nao i jenism evri samting long mi. Stat long taem ia i go, mi save blong miwan se gospel ia we i kambak hem i tru. I no gat wan i save tekemaot save ia long mi. Mi bin save wij rod blong folem, mo i no gat samting i save jenism hemia.


Mi bin gat fulap kwestin taem we mi yang moa. Mi bin lanem se mi wan pikinini blong God, Hem i lavem mi, Hem i gat wan plan blong mi, mo Hem i wantem blong ansarem ol prea blong mi. Save ia i bin jenism ful lukluk blong mi long laef. Mi bin lanem huia mi mo wanem mi mekem i impoten.

### ?Go Wetem Evriwan o Stanap Miwan?

Bifo we mi bin lanem se mi wan pikinini blong God, mi bin wantem go wetem evri man. Mi fraet blong stap stanap miwan. Be afta mi lanem se mi wan pikinini blong God, mo mi kam blong luksave mi save stanap miwan; mi save defren.

Blong stap prea mo luksave se mi wan boe blong God i givim mi strong tingting blong eksplenem ol filing blong mo long papa mo mama blong mi, be tufala i no andastanem gud tumas. Oli ting se mi stap go agens mo mi smol tumas blong mekem desisen ia blong kasem baptaes. Oli bin sem se boe blong tufala i stap folem

wan religijn we oli no save tumas long hem mo i no ol kastom blong olgeta. Mi bin save huia mi mo wanem mi wantem, be tu, mi bin wantem blong givim ona long papa mo mama blong mi mo hop se bae tufala i givim ona long religijn blong mi.



## ?Givim Ona long Papa mo Mama blong Mi o Tanem Baksaed long Ol Wari blong Olgeta?

Mi eksplenem situesen blong mi long ol sista misinari. Oli bin gat wan aedia—bae oli kam blong toktok long papa mo mama blong mi mekem se bae oli filim moa gud abaat religijn ia. Mi talem long olgeta se mi fraet se nogud bae papa mo mama blong mi oli no wantem toktok long olgeta. Afta, wan long ol sista i givim tingting se bae mifala i lego kakae tugeta.



Taem mi no bin kakae brekfas, mama blong mi i bin wari. "?From wanem yu no kakae?" hem i askem. Mi eksplenem se mi stap lego kakae, mo hemia i mekem hem i wari moa.

"Faswan, yu stap go long wan religijn we yumi no save tumas long hem, mo afta naoia yu no stap kakae. Mi mi wari. !Mi sek ia! Bae mi ringim ol misinari ia."

Hem i ringim ol sista, mo long sam wei, !oli invaetem tufala i kam long haos blong mifala blong kakae tugeta!

Mifala i bin gat wan gudfala taem. Ol misinari oli tijim papa mo mama blong mi hym ia "Mi Pikinini blong God" (STSP, pej 58), mo mifala i singsing long hem tugeta. Papa blong mi i bin laekem tumas. Afta long dina wetem ol sista, papa mo mama blong i no wari abaat mi blong stap go long jos. Mo mi filim se mi save givim ona long tufala taem mi stap laef folet gospel from hem i kavremap evri samting we oli bin tijim long mi. Mi bin tingting se sapos mi lavem olgeta longtaem inaf mo tritim olgeta kaen inaf, bae long en bae oli andastanem. I tekem mi 35 yia afta long baptaes blong mi, be mama blong mi i bin baptaes mo !go tru long tempol sam yia i pas nomo!

Blong save se mi mi wan pikinini blong God i bin gat paoa long fulap desisen blong laef blong mi. Mi save tu se taem yumi folet Spirit mo mekem wanem Papa long Heven i askem yumi blong mekem, iven taem i luk se i had, Hem bae i blesem yumi. Hemia i oltaem bes joes. ■



# STAP YUSUM GUD TAEM BLONG YU

*Taem yu putum Lod faswan, bae i gat rum blong evri nara samting.*

I kam long Natasha Andersen

Ol Magasin blong Jos

## OL MATERIOL

- Wan klia botel kontena
- Sanbij, korel, raes, mo ol smolsmol smut ston
- Ol bigfala ston (samples saes blong ol golf balong, o samples 5 sentimeta i go kros)

**STAP RERE:** Skelem ol ting blong yu fastaem mo putum ol bigfala ston insaed long botel kontena fastaem. Ademap inaf sanbij (o korel, raes, o smolsmol smut ston) blong fulumap botel kontena kasem antap. Maet bae yu wantem blong seksekem glas kontena taem yu stap ademap sanbij mekem se bae i fulumap gud emti spes. Naoia sakem ol ston mo sanbij long ol seperet kontena bifo yu tijim lesen ia.

**?!** I gat hamas defren aktiviti we oli stap faet blong kasem ae mo tingting blong yu evri dei? Yumi evriwan i gat ol semmak 24 aoa ia blong spendem, !be olsem wanem yumi jusum blong yusum taem ia i mekem bigfala defren!

Presiden Dallin H. Oaks, Fas Kaonsela long Fas Presensi, i bin talem: "Namba blong ol gud samting we yumi save mekem, i bigwan tumas bitim taem we yumi gat blong

mekem olgeta samting ia. Sam samting oli moa gud bitim gud, mo olgeta samting ia nao oli mas kam faswan long laef blong yumi. . . . Yumi mas lego sam gud samting blong save jusum sam we oli moa gud, o gud evriwan."<sup>1</sup>

Long aktiviti ia, bae yu soem wanem i happen taem yumi mekem wok blong Lod i fas samting we i impoten.

## 1. TAEM BLONG FULUMAP SAMTING

I gat plante gudfala aktiviti we yumi save yusum taem blong yumi blong mekem. Askem famli blong yu blong serem sam long ol samting we oli stap spendem taem blong olgeta blong mekem evri dei.

Eksplenem se botel kontena ia i ripresentem taem. Ol ston mo sanbij i ripresentem ol defren samting we yumi save mekem wetem taem blong yumi: ol bigfala ston oli ripresentem ol samting we Lod i askem yumi blong putum i kam faswan, olsem skriptja stadi, seves, tempol mo famli histri wok, stap go long jos, mo sanbij i ripresentem ol



nara gudfala aktiviti, olsem mekem homwok mo spendem taem wetem ol fren.

## 2. PUTUM OL IMPOTEN SAMTING OLBAOT NOMO

Kapsaetem evri sanbij i go insaed long glas kontena fastaem, afta ademap ol bigfala ston antap. Taem yu putum sanbij faswan, i no gat inaf spes blong evri nara bigfala ston—semmak olsem, taem yumi mekem ol nara aktiviti i kam moa impoten bitim ol samting we Papa long Heven i givim oda long yumi blong mekem, bae yumi nomo gat inaf taem blong ol samting we oli moa impoten.

## 3. MEKEM OL SAMTING I FOLDAON LONG STRET PLES


Jisas Kraes i givim oda se, "Yufala i no lukaotem ol samting blong wol ia, be yufala i lukaotem faswan blong bildimap kingdom blong God, mo blong stanemap stret mo gud fasin blong hem" (Josef Smit Translesen, Matiu 6:38 [long Matiu 6:33, futnot a]). Tokbaot olsem wanem yu save yusum taem blong yu long ol samting we i moa impoten taem yu stap lukaotem kingdom blong God *faswan*.

Emti aot glas botel blong yu mo stat bakegen wetem ol semmak samting. Maet ol yangfala pikinini bae oli wantem blong help. Mekem olgeta i putum ol bigfala ston insaed long glas kontena faswan. Taem yu stap ademap sanbij afta, wajem olsem wanem hem i fulumap ol ekstra spes raon long ol bigfala ston kasem taem yu fulumap evri sanbij insaed.

Askem long famli blong yu wanem oli ting se promes ia we Presiden Russell M. Nelson i minim: "Taem yu givim oltaem wan gudfala pat blong taem blong yu, bambae Hem i dabda-bolem wanem we i stap."<sup>2</sup>

## STAP PUTUM LOD FASWAN

Taem yumi stap lukaotem blong mekem wanem God i wantem yumi blong mekem *faswan*, Hem i helpem yumi blong gat inaf taem blong evri nara samting we i nid mo i leftemap tingting. So, sapos yu stap hadwok blong faenem inaf taem blong finisim homwok, developem ol talen blong yu, o gat inaf slip, askem Lod wanem yu save mekem blong putum ol impoten samting faswan long taem blong yu folem plan blong Hem. Putum ol gol tugeta olsem wan famli blong putum wok blong Lod—mo rilesensip blong yu wetem Hem—faswan evri dei. ■



### OL NOT

1. Dallin H. Oaks, "Good, Better, Best," *Liahona*, Nov. 2007, 104, 107.
2. Russell M. Nelson, "Stanap Olsem Wan Tru Man blong Mileniom," *Liahona*, Oktoba 2016, <https://www.churchofjesuschrist.org/study/liahona/2016/10/young-adults-stand-as-true-millennials?lang=bis>.



## WAN KWAET VOES WE I PUS STRONG

**WAN DEI TAEM** mi stap mekem misinari wok long ol striit blong Kenya we i fulap long das, kompanion blong mi i toktok long wan woman. Hem i akseptem smol kad we mitufala i givim long hem be i talem long mitufala blong nomo kambak.

Sam dei afta, mitufala i stap long semmak striit, mo mitufala i harem kwaet voes ia blong jekem woman ia. Mi askem miwan, “?From wanem mitufala i stap gobak taem hem i talem long mitufala blong no gobak?” Be mitufala i obei long kwaet voes ia.

Hem i sapraes taem mitufala i kasem long we be i talem se hem i glad blong luk mitufala. Mifala i stat blong tijim wan lesen, be i no longtaem i lid i go long wan raorao blong no agri. kompanion blong mi mo mi i endem lesen wetem wan prea mo mitufala i go mo agri kwiktaem blong nomo gobak. Be stret long nekis dei, *bakegen* mitufala i harem kwaet voes ia i strong blong mitufala i gobak. Mi no bin wantem blong gobak, be kompanion blong

mi i talem se mitufala i mas lisin long Spirit. Mekem se mi solemdaon hae tingting blong mi, mo mitufala i gobak. Taem mitufala i kasem long we, mi bin sek. Woman ia i olsem wan defren man. Laet long fes blong hem i jenis, mo hem i glad blong lisin long wanem mitufala i gat blong talem. Long nekis visit blong mitufala, hem i askem mitufala wetaem bae hem i save kasem baptaes.

Fo wik afta, hem i kasem baptaes mo kam wan memba blong Jos la blong Jisas Kraes blong Ol Lata-dei Sent. Afta long konfemesen blong hem, hem i haggem mitufala i talem long mitufala se bae hem i talem tangkyu oltaem from we mitufala i bin gobak. Mi bin lanem se yumi mas oltaem lisin mo mekem folem ol kwaet toktok blong Spirit. Papa long Heven i stap rere long ol pikinini blong Hem blong kasem gospel ia, mo Hem i stap yusum yumi evriwan blong faenem olgeta tru long Tabu Spirit. ■

*Leaha M., KwaZulu-Natal, Saot Afrika*

### ?OLSEM WANEM NAO MI SAVE FOLEM GUD MOA OL KWAET TOKTOK BLONG SPIRIT?

1. **Prea blong kasem givhan.** Lod bae i lidim yu tru long Tabu Spirit (luk long Alma 37:37).

2. **Gat tingting i stap daon.** Fasin blong gat tingting i stap daon i invaetem Spirit (luk long Moronae 8:26).

3. **No tingting tu.**  
Man we i folet fasin blong wol i temtem yu blong no lisin long ol kwaet toktok (luk long Mosaea 3:19). !No tingting tu taem wan gudfala tingting i kam!

4. **Wok folem kwiktaem.** Komitim yu blong oltaem ansa *kwiktaem* long ol kwaet toktok we i kam long Spirit (luk long Thomas S. Monson, “The Spirit Giveth Life,” *Ensign*, May 1985, 68–70).

## RISEN BLONG OL RUL

**MI BIN GLAD** tumas blong go long yut konfrens, be afta mi faenemaot se i gat fulap rul—eksampol, nogat ol mobael fon mo no go aotsaed yuwan. I luk olsem ol adalt oli stap wajem mifala oltaem. Be mi bin gat wan gudfala taem, mekem fulap fren, wok long wan seves projek, mo lanem abaot gospel.

Long taem blong wan testemoni miting long las dei blong yut konfrens, wan long ol lida i bin toktok abaot hamas hem i lavem mifala, ol yut long stek.

*Sapos yu lavem mifala, ?from wanem mifala i gat fulap rul long ples ia?*  
Mi tingting long miwan. Long semmak taem ia, olsem se hem i save ridim maen blong mi, hem i ansarem kwestin blong mi.

Ol lida oli putum ol rul i stap, hem i talem, i no blong hambak long mifala be i blong sefti blong mifala. Long taem we hem i talem hemia, Spirit i bin tajem mi. Mi andastanem se Papa long Heven i givim ol komanmen long yumi from ol semmak risen. Oli no blong hambak long yumi; oli blong helpem yumi blong gobak sef long Hem (luk long Doktrin mo Ol Kavenan 82:2-9).

Tabu Spirit i tajem mi mo helpem mi blong save se hemia i tru. ■

*Serge P., île-de-France, Franis*



## ?WETAEM MI SAVE JOENEM JOS?

**TAEM MI GAT** samples faef yia, papa blong mi i lusum fet mo i disaet blong lego Jos. I had tumas, speseli taem mi kasem eit yia blong mi. Mi glad tumas blong kasem baptaes, be afta papa blong mi i talem no. Hem i wantem mi blong wet kasem taem mi olfala moa blong mekem se mi save gud wanem mi wantem givim miwan blong mekem. Mo afta mi bin stap nomo blong luk ol fren blong mi oli kasem baptaes.

Mi tingbaot se mi bin konfius—sapos Jos i tru, ?from wanem oli stopem mi blong kasem baptaes? Olsem wan yangfala, i bin had tumas blong stap luk ol yut oli go long tempol from mi bin wantem blong go tumas. I bin had blong no save tekpat, be oltaem mi save se !bae mi gat janis blong mi yet!

Long Mei 2019, mi kasem baptaes long 16 yia blong mi. Mi tingbaot fulap eksperiens we mi bin gat blong filim stret glad ia we i klin evriwan blong gospel ia mo blong kasem wan testemoni. Hem i wan eksperiens we i spesel tumas, mo long evri trabol we mi gotru long hem blong kasem dei ia, mi save wetem evri hat blong mi se gospel ia i tru mo i bin tru oltaem. ■

*Trinity C., Colorado, YSA*



# Testemoni mo Fasin blong Jenisim Laef

I Kam long Elda David A. Bednar

Blong Kworom blong Olgeta Twelef Aposol

---

**W**an impoten lesen abaoi testemoni mo fasin blong jenism laef i go tugeta mo i impoten long ol misinari wok blong ol boe blong Mosaea.

"Olgeta we oli tekem olgeta blong kam save long saed blong trutok, tru long ol prijing blong Amon mo ol brata blong hem, folet spirit blong revelesen, mo blong profesi, mo paoa blong God we i stap mekem ol merikel long olgeta—yes, . . . olsem we Lod i stap laef, olgeta long Ol Man blong Leman we oli bin biliv long ol prijing blong olgeta, mo oli jenism laef blong olgeta long Lod, oli neva foldaon i go lus.

"From oli bin kam wan stret mo gud pipol; oli bin putum daon ol tul blong faet blong olgeta, oli no faet agensem God bakegen. . . .

"Nao, hemia i olgeta we oli jenism laef blong olgeta long Lod" (Alma 23:6–8).

I gat tufala bigfala samting we oli tokbaot long ol ves ia: (1) save long trutok, we yu save talem se i testemoni, mo (2) jenism laef i go long Lod, we mi andastanem se hem i taem yumi tanem yumi i go long Sevya mo gospel blong Hem. Long wei ia nao, taem yu joenem tugeta, testemoni mo jenism laef i go long Lod, i mekem yu yu stap strong mo yu stanap strong mo no muvmuv mo yu gat proteksen long saed blong spirit.

Wan testemoni i wan save long saed blong spirit long trutok we yumi kasem tru long paoa blong Tabu Spirit. Fasin blong stap gohed blong jenism laef i wan strong divosen long trutok we yumi bin kasem—wetem wan hat i glad blong mekem mo blong ol stret mo gud risen.


Blong stap save se gospel i tru i laef blong wan testemoni Blong stap tru oltaem long gospel i laef blong fasin blong jenism laef. Yumi mas save se gospel i tru mo stap tru long gospel.

Blong putum "ol tul blong faet" we yumi laekem tumas long saed, olsem fasin blong stap selfis, hae tingting, mo fasin blong no stap obej, i nidim moa bitim fasin blong stap biliv mo save samting nomo. Wanem i kam fastaem long hemia i, strong tingting we i winim evri samting, fasin blong putum tingting i stap daon, fasin blong sakem sin, mo save lisin; evri samting ia i kam fastaem long fasin blong lego 'ol tul blong faet' blong yumi. ?Yu mo mi i gat ol tul blong faet we i holemtaet yumi yet blong jenism yumi i go long Lod? Sapos yes, yumi nid blong sakem sin naoia.

Mi promes se taem yumi kam long wan save blong trutok mo stap konvet i go long Lod, bae yumi stap strong mo no muvmuv, mo no save foldaon." ■

*I kamaot long wan toktok blong jeneral konfrens blong Oktoba 2012.*

# Amulek mo Alma



Oli bin  
ol kompanion  
**misinari we**  
**oli gat paoa**  
we oli bin tijim gospel  
long fulap pipol.



God i  
bin givim paoa  
long olgeta  
mekem se oli  
**no save kilim**  
**olgeta i ded**  
o holemtaet olgeta  
long prisn.



Amulek i bin  
jenisim laef afta we  
wan enjel i talem  
long hem blong  
**akseptem**  
**wan profet**  
(Alma) insaed long  
haos blong hem.



Alma i komperem  
**fet long tok**  
**blong God**  
blong planem wan  
sid we bae i gro  
taem yumi stap  
fidim mo lukaot gud.



Alma i bin  
jenisim laef blong  
hem afta we  
wan enjel i talem  
long hem blong  
**stop blong**  
**stap spolem**  
Jos la blong God.

## ?YU STAP WARI ABAOT FIUJA?

*Blong stap fesem ol samting  
we yu no sua long hem,  
ol yangfala adalt oli serem  
wanem oli bin mekem blong  
trastem God mo rere from fiuja.*

44



YUT

FAMLI BLONG MI I NO  
WAN HAPI FAMLI—  
KASEM TAEM MI  
JOENEM JOS

54

LESEN WE OLI YUSUM  
SAMTING LONG HEM


OL STON MO  
OL SAMTING WE  
I MOA IMPOTEN

60

PAPA MO MAMA


HELP EM OL PIKININI  
BLONG ANDASTANEM  
SE OL BODI BLONG  
YUMI I OL TEMPOL

F4



JOS IA BLONG  
JISAS KRAES  
BLONG  
OL LATA-DEI SENT

# Fren



**!ALMA**  
i kam wan  
gudfala misinari!  
Ol pej F20-F23



I Kam long Elda  
Dallin H. Oaks  
Fas Kaonsela long  
Fas Presidensi

# Stap folem Ol Paeonia



Wan taem mi bin wokbaot long sam rod we  
Ol Paeonia blong Jos blong  
bifo i bin wokbaot long hem long  
rod blong olgeta i go long Sol Lek Vali.

Mi bin gat tingting we i stap daon bigwan blong wokbaot long ples we ol paeonia oli bin wokbaot long hem. Be i no impoten tumas blong wokbaot long ples we oli bin wokbaot long hem olsem we i blong laef olsem we oli bin laef.

Ol paeonia oli bin wokbaot fored wetem fet insaed long wan niu relijin, wan niu graon, mo wan niu wei

blong mekem ol samting. Oli bin trastem God. Yumi nidim **fet** tu.

Oli bin folem wanem ol lida blong olgeta i bin askem olgeta blong mekem. Yumi nidim blong stap **obei** tu.

Oli bin yusum ol talen blong olgeta mo wok tugeta blong bildim Saeon. Yumi nidim blong **stap wan** tu.

Oli no bin lego eniwan biaen. Oli bin mekem sua se olgeta we oli stap fesem ol trabol oli stap wetem olgeta tu, long rod. Yumi nidim blong **mekem evriwan i pat** tu.

Yumi save givim ona long ol paeonia taem yumi stap folem ol eksampol blong olgeta. ●

*Oli karemaot long "Stap Folem Ol Paeonia," Ensign, Nov. 1997, 72-74.*

## Mi Save Kam Wan Paeonia

Eniwan we i lidim rod blong mekem laef blong famli blong olgeta i kam moa gud i wan paeonia.

Faenem rod blong yu long ol rod ia. Blong stap pas tru long ol rod ia, yu save kam wan paeonia taem yu . . .

Stat

Taem mi help blong statem wan gudfala fasin o kastom.

Taem mi tijim famli blong mi abaot gospel.

Taem mi lanem wan samting we i niu.

Taem mi mekem ol samting blong bildim famli blong mi we i no save finis.

Finis

# Joes blong Lila

Lila i bin wantem blong jusum raet.



## I kam long Carolina Marín

(I folem wan tru stori)

*"My body is the temple my Father gave to me"* (Children's Songbook, 153).

"**T**aem blong skripja!" Lila i talem.

Lila i laekem tumas blong stap rid long smol sis-ta blong hem, Anika, mo bebi brata blong hem, Svetan. "I no longtaem bae Lila i kasem baptaes! Blong hem i rere, hem i wantem blong ridim ol skripja evri dei."

Lila i openem skripja stori buk i go long fas pej. Anika mo Svetan oli fasfas kolosap blong save luk ol pikja.

"Lisin gud from bae mi askem ol kwestin afta," Lila i talem. Afta hem i stat blong ridim fas japta.

"Bifo yumi bon, yumi bin laef long heaven," Lila i ridim. "Yumi no gat ol bodi yet. Yumi ol spirit."

Lila, Anika, mo Svetan i lukluk ol pikja blong ol pipol we oli dresap long waet.

"?Rere from fas kwestin blong yu?" Lila i tanem hem i go long Anika. "?Yu kam wea bifo yu bon?"

Anika i klapem ol han blong hem. "!Heven!"

"Hemia i stret," Lila i talem. "?Mo Svetan i kam wea?"

"Hem i kam long heaven tu," Anika i talem. Svetan i

laflaf smosmol mo putum han blong hem insaed long maot blong hem. Lila mo Anika i laf. !Svetan i gat wan yia mo i wan naes bebi blong wan yia long Ajentina!

"Ful famli blong yumi i kam long heaven," Lila i talem. "Jisas tu, i kam long heaven. Hem i kam blong helpem yumi mekem se yumi save laef wetem Papa long Heaven bake-gen." Lila i poen i go long pikja blong Jisas long pej ia.

Afta we hem i finis blong rid, Lila i wokem tingbaot se i bin olsem wanem blong save laef wetem Jisas long heaven. Hem i wantem blong stap olsem Hem. !Oltaem hem i wantem blong jusum raet!

Long nekis dei long skul, bel blong Lila i mekem noes taem hem i stap wet long laen blong brekfas. Hem i save testem flaoa blong kek taem Senora Ruiz i putum i go long plet blong hem. !Oli smel gud tumas!

Afta Senora Ruiz i kasem wan kap blong melek. O o, Lila i tingting. Melek ia i luk olsem i moa dak bitim oltaem. Samtaem skul blong hem i stap ademap kofi o ti long ol dring.

"I gat eni kofi o ti long melek blong tedei?" Lila i askem.



Senora Ruiz i saksakem han blong hem. "Wan smol kofi," hem i talem. "Bae yu no iven save testem."

Lila i tingting blong wan smol taem. Hem i tingbaot olsem wanem hem i bin wantem blong stap moa olsem Jisas mo jusum raet. Hem i save se blong dring kofi i wan samting we ol profet oli talem blong no mekem.

"No, tangkyu. Bae mi no gat melek tedei," Lila i talem. Hem i smael long Senora Ruiz. Mo afta hem i sidaon blong kakae.

Long naet ia, Lila i helpem papa blong hem blong wasem ol plet long kijin. Hem i stap tingbaot skripja stori ia yet. Hem i stap tingbaot melek ia tu.

"Papa?"

"Yes?" Papa i talem.

"From wanem Papa long Heven i wantem yumi blong gat bodi?"

Papa i stap tingting long hemwan taem i rinsim wan nara plet. "Hem i givim bodi long yumi mekem se yumi save kam olsem Hem," hem i talem. "Bodi blong yu i wan hom blong spirit blong yu. Hemia nao wanem

yumi minim taem yumi talem ol bodi blong yumi oli ol tempol."

Lila i saksakem hed blong hem blong agri. !Hem i bin singsing wan singsing abaot hemia long Praemeri samtaem! "?Hemia ia nao from wanem Papa long Heven i wantem blong yumi lukaot gud long bodi blong yumi?"


"Hemia stret wantaem," Papa i talem.

"Tedei long skul, oli putum sam kofi long melek," Lila i talem. "Mi no bin dring. Mi stap traem blong lukaot long tempol blong mi."

"Mi glad long yu," Papa i talem. Hem i waepem ol han blong hem i drae long wan tawel mo i givim wan hag long Lila.

Lila i haggem Papa strong. Hem i hapi blong lukaot long bodi we Papa long Heven i bin givim long hem. ●  
Hem we i raet i stap long Korientes, Ajentina.

Famli long stori ia oli stap laef long Ajentina. Ridim nekis atikol blong lanem moa abaot kantri blong olgeta.



**!Halo!**  
Mitufala i  
Margo mo  
Paolo.

# !Halo i Kam Ajentina!



Empanadas oli wan popula kaekae long Ajentina. Oli wan flaoa blong kek we oli fulumap wetem mit blong buluk, kon, o frut. !Yam!



**Ajentina** i wan kantri long Saot Amerika. Hem i moa long 2,000 mael (3,219km) longwan. Long not, Hem i hot tumas long sama taem. Long saot, !i gat ol reva mo wota we i aes truaot long yia!

Fulap intresting animol i laef long Ajentina—  
!ol jagua, kondo, mo penkwin!



Oi Kaoboe oli singaotem olgeta gaujos long Ajentina. Oli lukaotem ol buluk mo hos.

## !Mitim sam fren blong mifala blong Ajentina!

Plante man i pem kaekae long ol maket. Boe ia i stap helpem papa blong hem blong karem wan sandfa o wotamelen.



!Ushuaia i wan long ol siti we i moa kolosap long Saot Pol long wol! I gat tri wod long siti ia.



Gel ia i visitim Córdoba Ajentina Tempol long dei we oli dediketem. II no longtaem bae Ajentina i gat tri tempol!



Taem Presiden Russell M. Nelson i presentem niufala program blong ol gol blong ol pikinini mo yut, mi putum ol gol blong ronron, stap olesem wan gud fren, mo mekem ol prea blong mi i moa gud. Mi bin serem testemoni blong mi long sakramen miting se mi save se sapos mi mekem program ia, Papa long Heven bae i helpem mi.

**Gonzalo L., 7 yia, Buenos Aires, Ajentina**



Taem yumi ridim ol skripja, yumi lanem abaot Jisas Kraes mo olesem wanem Hem i lavem yumi. Hemia i helpem mi blong stap hapi. Mi save se Hem i lavem mi.

**Emma L., 5 yia, Buenos Aires, Ajentina**

**?Yu yu blong Ajentina? !Raet i kam long mifala! Bae mifala i laekem tumas blong harem yufala.**

**Tangkyu blong wokbaot long Ajentina wetem mifala. !Lukim yu nekis taem!**





Smol Kat  
blong Bred

## I kam long Gayle Kinney-Cornelius

(I folem wan tru stori)

*“Taem we yufala i stap wok blong ol narafala man, yufala i stap mekem wok blong God blong yufala nomo”*  
*(Mosaea 2:17).*

**S**ammy i openem ol ae blong hem smo i pulum bigfala win. Hem i save smelem wan samting we i naes tumas blong kakae.

*!Mmmm, Papa i stap mekem bred!*  
Sammy i tingting long hemwan.

Papa i stap bekem bred blong famli evri Satedei. Sammy i laekem blong wajem hem i karemaot ol naes braon bred long oven. Oltaem Papa i givim fas pis blong bred we oli katem i go long Sammy.

*Be tedei i no Satedei, Sammy i tingting.  
?From wanem Papa i stap bekem bred?*

Sammy i kamaot long bed mo i go long kijin. Hem i askem long Papa se wanem i stap hapen.

*?Yu tingbaot wanem bisop blong yumi i askem yumi blong mekem?”* Papa i askem.

Sammy i saksakem hed blong hem se yes. “Hem i bin askem yumi blong helpem ol pipol. Mo mi bin helpem Sista Martin blong karem ol basket blong hem i go antap long ol step, ?yu tingbaot?”

“Yu bin mekem wan gudfala wok,” Papa i talem. “Mi bin prea abaot olsem wanem mi save help. Mi gat wan aedia blong bekem bred blong serem.”

Sammy i lukluk i go insaed long windo blong oven. Hem i kaontem ol bred.

“Wan . . . tu . . . tri . . . fo. ?Bae yu givim ol bred ia long huia?”

“Hemia i wan samting we mi nidim help blong yu long hem,” Papa i talem. “I gat wan bred blong Sista Martin. Mo tu bred blong famli Miller. Bae yumi givim namba fo bred long huia?”

Sammy i tingting long hemia.

“?Be Mista Lee?” Sammy i askem. Mista Lee i stap laef long wan apatmen bilding blong olgeta. Hem i no stap go aotsaed tumas. Fulap taem hem i stap wajem ol pipol long windo blong hem nomo.

“Hemia wan gudfala aedia,” Papa i talem.

Afta we bred i tan, Sammy i helpem Papa blong kavremap ol bred. Afta hem i go long kat blong hem. Hem i putum ol bred insaed.

“!Kat blong bred i rere blong ron!”  
Sammy i talem.

Papa i helpem Sammy blong pulum kat. Hat blong Sammy i filim naes mo wom, !semmak olsem ol bred ia we oli stap wantem blong serem nao! ●

*Hem we i raet i stap long Vemon, YSA.*

# Defren be Tugeta

I Kam long Bethany Bartholomew  
(I folem wan tru stori)



*"Wosip long fasin we oli wantem, long weaples we oli wantem, o wanem we oli wantem" (Ol toktok blong Bilif 1:11).*

**E**llie mo famli blong hem oli stap go blong visitim ol kasen blong olgeta we oli stap longwe. !Ellie i glad tumas! Hem i no bin luk ol kasen blong hem long taem.

Bifo long trip ia, papa mo mama blong Ellie oli talem se oli wantem tokbaot wan samting.

“Taem yumi kam tugeta wetem ol famli, oltaem yumi mas talem ol prea long taem blong kakae. Mo samtaem yumi tokbaot jos, i tru?” Papa i askem.

“!i tru!” Ellie i talem.

“Be, ol samting bae oli defren smol long trip ia,” mama i talem. ‘Anggel mo anti blong yufala i nomo stap

go long jos. Mo oli no laekem taem ol man i stap tokbaot hemia long olgeta.”

Ellie i mekem fes blong hem i nogud smol. “?From wanem no?”

“Yumi no save evri risen blong hem,” papa i talem. “Be olgeta i lavem yumi tumas. Mi ting se bae oli no wantem raorao wetem yumi o mekem yumi harem nogud. Mekem se oli askem sapos yumi save no tokbaot ol samting blong jos wetem olgeta.”

Ellie i saksakem hed blong agri.

“Yumi save gohed blong ridim ol skripja blong yumi mo prea taem yumi stap long we. Be bae yumi mekem taem yumi nomo yumi stap,” mama i talem.



"Be afta taem bae yumi kakae bae wanem?" Sista blong Ellie i askem.

"Bae yumi wet mo luk," mama i talem. "Sapos oli no prea bifo yumi kakae, yumi save talem wan prea long hat blong yumi."

"Okei," Ellie i talem. "Mi save mekem hemia!"

Long nekis dei, famli blong Ellie i fulumap trak. Oli draev kasem let long naet. Long en, taem oli kasem haos blong ol kasen blong olgeta, anti mo anggel blong Ellie i helpem olgeta blong karemaot ol basket blong olgeta long trak. Afta, evriwan i go silip.

Long nekis moning, Ellie i talem wan prea bifo i go long kijin blong kakae brekfas. Hem i harem i fraet smol

blong luk famli blong hem. Be afta, anti blong hem i sidaon narasaed long hem wetem wan naes smael long fes blong hem.

"Sam long yumi bae oli stap go long ples blong mekem hea blong kasen blong yu, samtaem tedei. ?Yu wantem kam?" hem i askem Ellie.

"Wan ples blong mekem hea?" Ellie i askem.

"Yes! Oli save mekem hea blong yu mo sista blong yu sapos yu wantem."

Ellie i smael mo saksakem hed blong talem yes. !Hemia i naes blong mekem!

Afta long brekfas, oli karem wan bas i go long ples blong mekem hea. Ellie i laekem tumas blong stap lukluk kasen blong hem i wok. Ol fingga blong hem i flae i go fored mo biaen taem hem i stap komem mo tanem hea. Afta we oli finisim hea blong evriwan, oli priten blong gat wan fashen so long fored blong ol mira mo stap laflaf smosmol long ol niufala stael lukluk blong olgeta.

Be long nekis dei, ren i ren strong. Mekem se evriwan i disaed blong stap insaed mo plei ol bod gem. Ellie mo wan long ol kasen blong hem oli stap long wan tim agensem tu long tufala boe we oli mo bigwan. Oli jik jikim olgeta taem oli stap resis long ol pisis blong gem blong olgeta raon long bod we oli stap plei long hem.

"Mifala i win!" Ellie i singaot taem hem i muvum pis blong gem blong hem kasem en blong bod. Olgeta evriwan i hae faef long olgeta—iven ol kasen we oli moa bigwan, we oli priten blong mekem fes i longwan from oli lus.

Sam dei nomo afta, hem i taem blong gobak hom. Taem Ellie i stap klaem i go biaen long trak blong famli blong olgeta, hem i harem famli blong hem i stap talem tata.

"Bae mifala i misim yufala!"

"Kambak i no long taem!"

"Mifala i lavem yu tumas!"

Ellie i smael mo tata taem trak blong olgeta i stap aot. Hem i gat fulap gud taem. Nomata we oli biliv long ol defren samting, oli save gohed yet blong stap olsem wan hapi famli. ●

*Hem we i raet i stap long Jojia, YSA.*

*!Katemaot mo glu, stepol long hem, o fasem ol  
pej ia tugeta blong mekem wan buk!*



# FET BLONG MI WE I STAP GRO

Nem:



Mi helpem fet blong mi long Jisas  
blong gro taem mi stap prea mo  
stap kaen long ol nara man.



Long Buk blong Momon, Alma i  
talem se fet i olsem wan sid.

4




Taem wan tri i gro, hem  
i save givim yumi swit frut.

1



2

Mi save planem sid blong fet blong miwan taem mi stap lisin long wanem ol profet mo skripja i tijim.



3

Wan sid i nidim wota mo laet blong san blong helpem hem i gro.



6

Taem fet blong mi i stap gro, bae i karem ol swit blesing i kam insaed long laef blong mi.



7

Bae mi save stap helpem fet blong mi blong gro strong. !Papa long Heven mo Jisas Kraes i lavem mi!



I kam long  
Cristina B. Franco  
Seken Kaonsela  
insaed long  
Praemeri Jeneral  
Presidensi

# Sikret Ingridien



Papa long Heven i wantem yumi blong givim seves long ol narawan. Praemeri tija blong mi i wan gud-fala eksampol blong seves. Taem mifala i kam long Praemeri, Sista Antonietti i stap karem joklet kek oltaem. !Mi no laekem joklet kek! Evri narawan i laekem. Be mi neva kakae.

Wan dei hem i askem mi: “?From wanem yu no wantem kakae wan smol pis?” Kek ia i oli mekem wetem wan spesel ingridien.”

Mi agri blong mi traem. Mo, ?yu save wanem? !Mi laekem!

Plante yia afta, mama blong mi i talem long mi wanem i sikret ingridien blong Sista Antonietti. “Sista

Antonietti i no bin gat tumas mane,” mama blong mi i talem. “Evri wik, bae hem i mas jusum blong pem bas fea blong hem mo ol pikinini oli go long Praemeri, o bae i pem ol ingridien blong mekem joklet kek blong klas blong yu. Oltaem hem i jusum joklet kek. Mekem se hem i jusum blong mekem joklet kek be i no bas fea, mo hem mo ol pikinini oli wokbaot ova long 3 kilometra wan wei, i nomata se ren o san.”

!Sikret ingridien blong Sista Antonietti hem i lav we hem i gat blong ol narawan! ●

Oli karemaot long “The Joy of Unselfish Service,” Liahona, Nov. 2018, 55–57.





Mi save folem Jisas Kraes  
long ol smol mo simpol wei.

(Luk long Alma 37:6.)

# Sapraes Misin Kol



## I kam long Lucy Stevenson

Ol Magasin blong Jos  
(I folem wan tru stori)

Edwin Dharmaraju i smael taem i wokbaot i kamaot long eapot mo san i saen long hem. Hem i save luk ol pam tri oli laen long ol striit mo smel blong ol spaes long wan maket we i stap kolosap. Hem mo waef blong hem, Elsie, li kambak long India! Oli bin stap laef long Samoa be naoia oli kambak hom bakegen.

Edwin mo Elsie i no kam blong visit nomo. Oli bin singaotem tufala blong wok olsem ol misinari blong Jos Ia blong Jisas Kraes Ia blong Ol Lata-dei Sent. Edwin i harem i fraet smol. Be hem i save se Papa long Heven bae i helpem tufala. Papa long Heven i bin helpem tufala fulap taem finis.

Edwin mo Elsie oli bon long India. Be Edwin nao i bin harem faswan abaot Jos taem hem i stap go long skul long Yunaeted Stet. Hem i bin go long jos wan taem long we. Hem i iven ridim Buk blong Momon. Be taem hem i gobak long India, hem i fogetem abaot Jos.

Sam yia afta, Edwin mo Elsie i filim se tufala i mas muv i go long Samoa. Edwin i wan saentis blong ol bebet, mo hem i tekem wan wok long aelan ia blong mekem sam wok mo stadi. Long we nao, Edwin mo Elsie tufala i mitim ol misinari. Taem Edwin i ridim Buk blong Momon bakegen, hem i filim wan spesel samting. Elsie i ridim Buk blong Momon tu. Oli bin jusum blong kasem baptaes, tugeta wetem ol boe mo gel blong tufala.



Afta we oli joenem Jos, wanem we Edwin i wantem moa li blong famli blong hem long India i lanem abaot gospel! !Problem se i no gat ol misinari long India blong tijim olgeta! Edwin mo Elsie i raetem wan leta i go long hedkwota blong Jos blong askem olgeta blong sendem ol misinari i go long India.

Wanem we i kam afta long hemia i wan bigfala sapraes. Presiden Spencer W. Kimball i singaotem *olgeta* !blong wok olsem ol misinari long India!

Mo naoia, tufala hemia.

Fas stop blong tufala long India hem i long haos blong brata blong Edwin. Papa, mama, mo ol brata mo sista blong Edwin i stap long we tu. Kwik taem nomo, Edwin mo Elsie i stat blong tijim olgeta. Famli blong olgeta i hapi blong lanem abaot gospel.

Sam wik afta, Edwin mo famli blong hem i kam tugeta raonem pul blong swimswim we i stap long yad blong brata blong hem. Oli bin klinim pul, pentem gud, mo fulumap wetem fres wota. Evriwan i bin werem waet klos. Ol woman oli werem ol longfala kaliko we oli hangem ova long ol solda blong olgeta. Ol man oli werem ol slakslak jaket we i stael blong India mo ol traoses.

Edwin i stanap insaed long pul wetem papa blong hem. "Samuel David," Edwin i talem, "Jisas Kraes i givim raet long mi, blong baptaesem yu long nem blong Papa, mo Pikinini mo Tabu Spirit."

Edwin i filim glad taem i baptaesem papa blong hem. Hem i filim moa glad taem i baptaesem mama blong hem nekis wan. Long en blong dei, !Edwin i baptaesem 18 pipol!

Long nekis dei, Edwin mo Elsie i ron long tren blong sikis aoa. Oli visitim moa memba blong famli mo tijim olgeta abaot gospel. Edwin i baptaesem fo moa long ol famli blong hem long wan reva we i stap kolosap.

Long en, Edwin mo Elsie i ron long tren blong 16 aoa blong visitim papa mo mama blong Elsie. Papa

blong Elsie i wan lida blong wan nara jos. Hem i no kasem baptaes, be hem i bin ting se Buk blong Momon i wan gud buk. Hem i help blong transletem Buk blong Momon i go long Telugu, wan long ol lanwis we oli stap toktok long hem long India.

Taem Edwin mo Elsie i finisim misin blong tufala, li bin gat inaf niu memba blong statem wan long ol fas branj blong Jos long India! Edwin mo Elsie oli hapi taem oli gobak long Samoa. !Oli talem tangkyu tumas long Papa long Heven blong sendem tufala i go long wan misin! ●



Edwin mo Elsie  
Dharmaraju i givim  
seves long misin  
blong tufala long  
India long 1978.  
!Oli stap bildim wan  
naesfala tempol  
naoia long we!

*Mi neva bin mekem eni samting we i  
nogud tumas. ?Mi Nidim blong Sakem  
Sin Yet?—No Sua Tumas  
long Yudine*

## Dia No Sua Tumas,

Evriwan i nidim blong sakem sin from, !no gat man i stret evriwan! Blong stap sakem sin i save simpol nomo olsem prea long Papa long Heven abaoit olsem wanem dei blong yu i bin go mo talem long Hem olsem wanem yu wantem blong kam moa gud tumoro. Yumi askem Hem from fogivnes taem yumi bin mekem wan samting we i rong, mo Hem i fogivim yumi. Sam pipol oli ting se fasin blong sakem sin i wan samting we oli fraet long hem. !Be hem i wan hapi samting! Fasin blong sakem sin i wan presen we Jisas Kraes i givim long yumi mekem se yumi save lan, gro, jenis, mo kam moa olsem Hem. Presiden Nelson i talem se yumi mas sakem sin evri dei. Taem yu mekem hemia, bae yu filim moa pis mo paoa long laef blong yu.

Wetem lav,

Fren

### !Traem hemia!

Olsem we spun i stap karemaot pepa blong kuk long aktiviti ia, blong stap sakem sin i save mekem yumi klin long ol rong joes we yumi stap mekem evri dei—we i bigwan o smol. From Jisos Kraes mo Atonmen blong hem, evriwan long yumi i gat janis blong sakem sin.

#### Bae yu nidim:


Sol blong kuk  
Blak pepa blong kuk  
Plastik spun  
tawel



1. Sakem sam sol long wan plet.  
Hemia i soem olsem wanem yumi klin evriwan mo klin bifo yumi sin.

2. Sakem smol pepa blong kuk antap long sol. Hemia i soem ol rong joes we yumi mekem.

3. Naoia tekem plastik spun mo rabem long wan tawel.



4. Muvum spun sloslo antap long sol mo pepa blong kuk. !Pepa blong kuk bae i fas long spun! I semmak olsem nao taem oli fogivim yumi taem yumi sakem sin.



# Smol mo Simpol Pasel

Olsem Liahona we i bin  
gaedem famli blong Lihae,  
ol simpol samting i save  
helpem yumi blong stre-  
tem ol bigfala problem  
(luk long Alma 37:6,  
38-44).

?Yu save faenem ol narafala  
pisis andanit long pasel ia?



?Wanem ol smol mo  
simpol wei we yumi save  
folem Jisas long hem?

# Yangfala Alma I Sakem Sin

Haley Yancey

Oi Magasin blong Jos



Alma i boe blong wan profet. Oli putum nem blong hem afta long papa blong hem, be hem i no bin biliv long wanem papa blong hem i bin tijim.


Hem i talem long ol pipol se Jos i no tru.




Wan dei wan enjel i kamaot long Alma.  
Enjel ia i talem long Alma blong sakem sin.



Blong tri dei Alma i bin silip. Hem i stap tingting abaot ol nogud joes blong hem.



Afta Alma i bin prea blong kasem fogivnes.  
!Mo God i fogivim hem! Hem i bin filim lav blong Kraes. Alma i wekap mo i tijim ol narawan abaot olsem wanem Jisas i bin sevem hem.



Mi save sakem sin taem mi mekem wan rong joes.

Jisas bae I oltaem stap wetem mi. ●

*Yu save ridim abaot stori ia long Mosaea 27.*

# Alma I Bin Sakem Sin mo Folem Jisas



Taem yu mekem rong joes,  
?wanem nao mi mas mekem?



# Ol Dia Papa mo Mama,

Samtaem mifala i no agri wetem ol nara pipol. Be, yumi save lavem olgeta yet. Yumi save holemtaet wanem we yumi save se i tru tu. Ridim stori long pej F10 wetem ol pikinini blong yu mo askem ol kwestin ia:

?Olsem wanem famli blong Ellie i soem lav?  
?Olsem wanem famli blong Ellie i kipim fet blong olgeta i strong?  
?Olsem wanem nao famli blong yumi i save soem lav long ol nara man, nomata taem yumi no agri?

!Yumi evriwan i defren, be evri man i wan pikinini blong God!  
Serem lav,  
*Fren*

## OLSEM WANEM BLONG SENDEM OL WOK BLONG ART BLONG PIKININI BLONG YU O EKSPERIENS I GO LONG LIAHONA

Go long liahona.ChurchofJesusChrist.org mo klik long "Submit an Article or Feedback." O sendem imel i kam long mifala long liahona@ChurchofJesusChrist.org tugeta wetem nem blong pikinini blong yu, yia blong hem, siti we yu stap long hem, mo toktok ia we i givim raet: "Mi, [putum nem blong yu], givim raet long Jos Ia blong Jisas Kraes blong Ol Lata-dei Sent blong yusum wok blong pikinini blong mi long ol magasin blong Jos, long ol Websaet blong Jos, mo long ol sosol media, mo long ol nara buk blong Jos." !Mifala i no save wet blong harem yufala!

## OL SAMTING WE OLI STAP INSAED

- F2** I Kam long Fas Presidensi:  
Stap Folem Ol Paeonia
- F4** Joes blong Lila
- F6** !Halo i Kam long Ajentina!
- F8** Smol Kat blong Bred
- F10** Defren be Tugeta
- F12** Fet blong Mi We I Stap Gro
- F14** Fren I Go long Fren: Sikret Ingridien
- F15** Gudfala Tingting
- F16** Ol Eksampl We I Soem Strong Paoa long Tingting: Sapraes Misin Kol
- F18** ?Wanem Nao I Stap long Maen blong Yu?
- F19** Naes Pleiplei: Smol mo Simpol Pasol
- F20** Ol Skripja Stori: Yangfala Alma I Sakem Sin
- F23** Pej blong Kala: Alma I Bin Sakem Sin mo Folem Jisas



**!Faenem Liahona we  
i haed i stap insaed!**

I STAP LONG FREN KOVA

Ol pikja droing oli kam long Rebecca Sorge Jensen